

**ORATIONES DECEM
CORAM PAULO 3.
PONT. MAX. &
REUERENDISSIMOR
UM CARDINALIUM...**

Egidio Riccardi



ORATIONES DECEM CORAM PAVLO .III. PONT.

49

Max. & Reuerendissimorum Cardinalium
confessu per Fratrem Egidium Ricar-
dum Sacre Theologiæ & Carmeli-
tani instituti professorē habitā.

1. De functione apostolica.
2. De regno Christi.
3. De gloria ciuitatis nouæ hierosolimæ.
4. De dignitate hominis.
5. De ecclesiastica unione & communione.
6. De sacerdotii dignitate.
7. De diuine uocis uirtute.
8. De diuini sapientia spiritus.
9. De inscrutabilibus uiis dei.
10. De foecunda ecclesiæ sterilitate.



Venetii M. D. XL.

THE HISTORY OF THE CITY OF BOSTON FROM THE FIRST SETTLEMENT TO THE PRESENT TIME IN TWO VOLUMES. BY NATHANIEL BENTLEY.

1. The first settlement of the city.
2. The growth of the city.
3. The establishment of the city.
4. The city of Boston.
5. The city of Boston.
6. The city of Boston.
7. The city of Boston.
8. The city of Boston.
9. The city of Boston.
10. The city of Boston.

THE HISTORY OF THE

2 50

FRATER EGIDIUS RICARDVS
CARMELITA CANDIDO ET
PIO LECTORI SALVTEM.

Um orationes aliquot pbreues/pro meo munere/atq; usu Ro. curia, corā Paulo. III. Pont. Max. & Reuerendissimorum Cardinalium ordine habuisssem, complures amici/tum literis/tum pietate clari/eas quotidie a me/qui nihil tum noui in illis suspiciebam/extorquere conati sunt. Cumq; sepius efflagitarent, ut quas uel audissent/uel legissent/eas inuulgari sinerem/quas tamen ego alioqui indignas iudicarem/quę in lucem prodirent/& omnium iudicio exponerentur. Atq; contra illi contenderent, probari debere orbi Christiano/quod summis ipsius Christiani orbis principibus non ingratum extitit/tum ego fore per spexi/ut inuito me/ac reclamante/ille nō sine plerisq; mendis/ac proinde maiore meo periculo/ederentur. His accessit authoritas eius/& imperium/cui me/meaq; omnia deo/cuiusq; non modo extant in Carmelitanam societatem/uerumetiam in Rem Pub. Christianam præclara merita. Quid facerem non habebam/Itaq; non tam illorum rationibus/& (ut ingenue uerum fatear) huius auctoritate uictus/q̄ omnium impulsu,& ui coactus/citra arrogantiam cessi, & maius discrimen minori posthabendum ratus/doctiorum passus sum subire iudicium/quo aut monitus errata recognoscam/aut probatus/ad alia eaq; posteriora contendam. Hoc autem te præmoneo/lector optime/pleraq; in hisce meis esse oratiunculis siue enarra

A ii

tiunculis mauiſ/quę niſi enarratorem potius theologum,
 q̄ oratorem ſpectes/te fortassis offendēt. Imprimis quo
 rumdam/quę apud eximios illos romanę linguę principes
 non erant/uocabulorum nouitas/nempe/Chriſti/eccleſie/
 euangelii aut ſimilium/quę in eo ſignificatu non habeban
 tur.Sed hec ipſa nouitas neminem mouerit qui rerum ſua
 deſiderantium uocabula/in nouationem animaduernerit.
 Alia enim nunc/q̄ olim apud ueteres illos conſpicitur/apud
 nos/religiōis/imperii/& ceremoniarum forma/unde nouis
 opus fuiſſe nominibus pſpicuū eſt.Eſt & aliud/quod fateor/
 quodq; nemini offendiculo eē uelim/ſcilicet i hac nra opel
 la/non ubiq; rethoricas leges ad amuſſim(ut dī)obſeruari
 potuiſſe/tū qa genus hoc dicēdi iuxta ſacrarū līrarum cōce
 ptū ordinē/plerumq; didaſcalicū eſt/& enarrationibus ma
 gis q̄ argumētatiōibus fluens/ tū qa pſtrinxiſmus illud/earū/
 quę p tēporis rōne in tēplis legunt / ſcripturarū anguſtiis/
 tū deniq; qa nōnūq; diui Pauli & euāgelii lectionē/cōmiſcui
 mus/quę oīa exactā nō patiūt rethoricarū legū obſeruatio
 nē. Poſtremo ne qd amplius te offendat/nō pteribo q̄ ſup
 eodē(ubi grā)euāgelio/differētiū ſubiectorū oſones habue
 rim/id nō obefſe ratus/q̄ ſingula diuinę ſcripture noīa ſingu
 la expoſcere ſubiecta exiſtimē. Tametſi oīa ad unū ceu
 fontē refluūt/unūq; ſcopū reſpiciūt/a quo ēt mea ſubiecta/
 quātūcūq; uaria/nō abhorere/facile pſpicias.Hęc uero quā
 quā p ſua dignitate multo maximā oſonē requirebāt/eā tū
 p rōne loci/& cōfeſſus/anguſtia tēporis excluſi/& ſcriptura
 rū ſinibus cōcluſi/pſtare nō potuiſmus. Sumus hec breui
 ter pſati/ut qd nō authoris arrogātia/ſed amicorū impulſu/oī
 bus pſertim theologis offerē/citra offenſionē(ſi uidebit)
 legas/boniq; cōſulas.Itē atq; itē bene uale, Anno.1540

FRATRIS EGIDII RICARDI ³ IN

Ro. Curia procuratoris totius ordinis Carmelitarū

& S. T. pfeſſoris de functione apostolica oratio.

Coram Paulo. III. Pont. Max. & Reuerēdiſſi

morum Cardinalium cōſeſſu/ dominica. 4.

Quadrageſimæ. Anni. 1535. habita.

Vangelicus sermo, qui instar uehementissimæ
tubæ auribus insonuit; & occulta quadā tū ani
E mos penetravit, Beatissime Pater, salutis no
strę authorem trans lacum tiberiadis/ sequutā
se numerosam multitudinem satiasse comme
morat. In cuius hystoriæ summa, diuinissimam Apostolici
muneris functionem ob oculos positam existimo. Quare
etsi nihil mihi polliceor/ quod exequatida tantę rei magni
tudine/ tantiq; senatus/ quo maior in terris esse non potest/
expectatione dignum/ asserre possim, opere tamen precii
facturum me, sum arbitratus, si lectionis propositæ cancel
los non multum egrediens, euāgelici Apostoliciq; muneris
functionem, euāgelicis Apostolicisq; radiis illustratā osten
dero. Ad quod/ dum uires conatusq; admoueo, pertime
scerem uehementer, nisi immenso maiestatis tue splendo
ri, foelicissimam humanitatem coniunctam uiderem. In
quam/ cum omnem dicendi fiduciam contulerim, cęptum
sermonem/ altiori principio repetam.

Siquid unq̄ humanarum rerū, immortalī deo curę fuisse
credimus Patres Amplissimi, id Remp. Christianā
potissimum esse arbitror. Quam Christus/ Apostolici mu
neris functione, iis delegata/ quos ad tanti ministerii celsi

rudinem/ gratuita electione parauerat/ ita ornauit/ ut nihil
ea insignius, ita disposuit/ ut nihil ordinatius, ita deniq; fir-
mauit/ ut nihil stabilius. Non est cum tanta diuinę libe-
ralitatis munificentia/ quod facile conferri possit. Quid
enim ea diuinus? Quid/ quod interim taceo, potentius?
Qua factum est/ ut ad celestis illius hierarchię similitudinē/
ecclesiam adhuc in terris decertantem/ formatā perspiciamus.
Nam quemadmodum inter beatos illos spiritus/ talē
in ea ordinem/ diuina prouidentia constitutum legimus, ut
qui perfectiore intelligentia excelluerint/ in alios diuini lu-
minis fontem transfundant, ita supremus ecclesię hierar-
cha/ q in uices Christi/ locumq; susectus est/ Apostolicę fun-
ctionis/ qua omnibus ipse præstet/ & in omnes euangelicę lu-
cis radios trāffert/ ecclesiasticos proceres/ & episcopos/ par-
ticipes efficit/ ut pro suo quisq; munere ecclesiam sibi credi-
tam illuminet. Est enim apostolici officii functio/ spiri-
tualium omnium administrationum/ ueluti summa quādā
perfectissima, & copiosissima plenitudo/ qua/ iuxta sanctis-
simum Dei Opt. Max. uerbum/ resp. Christiana ita admini-
stratur/ ut christus ipse nunq; ei deesse credatur. Ipsum nāq;
seruatorem/ ad consummationem usq; seculi/ suę semper ec-
clesię ad futurū se promississe nouimus. Verum idcirco nō
nulli perniciosę nouitatis authores/ arrepta calumniandi
ansa, neminem in uices/ sedemq; eius/ qui nunq; absit, succe-
dere debere/ non modo non colligunt/ sed suo se ense iugu-
lantes/ Apostolicę functionis dignitatem multo insignius
illustrant. Qui enim corpore abfuturus/ pascēdum uice
sua gregē/ Petro Apostolici ordinis capiti/ incredibili sedu-
litate commendauit/ & apostolis omnibus euangelicę do-
ctrinę/ ministerium tradidit: is nihilominus omnibus spiri-

tu semper se adfuturum contestatus est. Itaq; multum
 abest, ut Apostolicus ille senatus, cui Christus sui numinis
 adflatu p̄sident, & quicumq; uere illum retulerit, ullo diui-
 nis in rebus errore contaminari queat. Qua fiducia Apo-
 stolicam auctoritatem Paulus eleuans, An experimentum
 (inquit) queritis eius q̄ in me loquitur Christi? Et scio (ait)
 q̄ & ego spiritum Christi habeam. Atq; rursus Apostolo-
 rum omnium nomine / q̄ pro Christo non quouis mundi
 princeps oratores nouiq; testamenti, quo cœlestium bono-
 rum hereditas legata est / disp̄atores agerent, fidentissime
 gloriatur. Quo fit, ut nō modo incomparabilem functio-
 nis huius magnitudinem extollat, uerumetiam temerarios
 Apostolicarum legum pr̄uaricatores qui nō homines sed
 Christum ipsum offendant / acerrime confodiat. Proinde
 Moses mussitanti illi ceruicoso populo. Quid (inquit) nos
 sumus? nec cōtra nos est murmur uestrū, sed cōtra dominū.
 Ministerium tamen illud & magisterium Mosi hoc multo
 erat inferius. Illud mortis erat, hoc uitalis spiritus, illud
 damnationis, hoc iusticię, illud rei euacuandę, hoc stabilis
 & eterne. Verumtamen ea illud claritate fulsisse creditur
 ut omnē, hebreorū intuitū & aciem ipse Mosi uultus into-
 lerabili fulgore obscurauerit. Huic igitur clarior multo, il-
 lustriorq; gloria & maiestas debetur. Quid enim hoc emi-
 nentius, quo uiuum Christi uerbum proponitur? quo cele-
 stis thesaurus promittitur? quo ciuitatis dei fundamentum
 iacitur? quo deniq; qui fungitur / non cuius nationi / sed re-
 gali cum primis sacerdotio & populo acquisitionis p̄fisi-
 citur? Sed nunc demum / a tantę functionis diuinitate ad-
 potentiam me confero. Qua factum est, ut docta illa igno-
 rantia / & sapiens (ut ita dicam) stulticia barbaras, & efferas

gentes/ac orbem fere uniuersum/non ferro, aut igne/sed oc-
cultâ quadam ui perdomuit. Nam & Paulus Apostolicæ
militiæ arma, non carnalia sed spiritalia, & diuine esse uir-
tutis affirmat, quibus impiorum hominum consilia demo-
liri, altitudinem aduersus scientiam Dei se extollentem de-
primere, intellectum in obsequium Christi captiuum ducere,
inobedientiâ deniq; iustę ultioni subiicere ualeat. Hęc
ad uindictam ipse admouit, dum incestuosum scortatore,
& Hymeneū, ac Alexandrum blasphemos sathanę tradidit:
Quæ potestas uere Apostolica utinam non superfluo usu
aliquando uilesceret. Sequitur dum Elimam uerbo ueritatis
contradicentem / & procōsulem a fide conantem euertere /
cæcitate percussit, Petrus autem quid ipse posset, aperte de-
clarauit / dum gladium spiritus arripit / Ananiam & Sa-
phiram / qui spiritui sancto mentiti fuerant, morte damna-
uit. Commemorare possem alia innumera in hanc senten-
tiam / quæ omnia nascentis ecclesiæ exordio, & pullulantis
fidei incrementō / & astruendę Apostolicæ authoritatis testi-
monio conueniebant. Quo circa, cū euāgelica administra-
tione nihil aut diuinius, aut potētius in terris haberi possit /
summa sapientiâ prouisum est / ut ei tantū qui religione / pie-
tate / doctrina / prudentia / innocētia / magnanimitate / tole-
rantia ecclesię cōmendatus fuerit / tā sublime ministeriū de-
legetur. At in apostolicas & Christiane Reip. administra-
tore dignas uirtutes incidit oratio / quarū imaginem in euā-
gelio elucescere uideo. Quid enim est, q̃ Iesus abiit? quid q̃
lacum transiit? quid q̃ eum multitudo sequitur? quid q̃ in
montē se recipit? nisi q̃ hęc omnia Aplica quedā munia ec-
clesiasticaq; administrationes / in specie pponunt, q̃ singu-
larim p euāgelicę lectionis exordio q̃ paucissimis pstringā.

Ad Apostolici

AD Apostolici muneris functionem, qua una Christiana
 no populo praesideris Patres Amplissimi, coeleste illu
 magistram no modo praecipis / sed suoru etiam factorum
 imagine / ues formasse, atq; hoc a uobis exquisuisse non
 ignoratis, ut uestre dignitatis amplitudinem non minori
 bus officiis & uirtutibus illustretis. Qui (ut ab euangelio
 non dimouear) dum abiisse describitur, hanc a uobis animi
 magnitudinem exegisse creditur, ut rebus no solum priua
 tis omnibus / uerum iis etiam / quae uulgo eximie & pracla
 re uidentur / contemptis / ad uere magnas & laborum ac pe
 riculorum plenas studium conuertatis. Itaq; in iis totius
 spiritalis exitus summa / quae apostolicum munus comen
 dat / consistere dignoscitur, ut imprimis a prestigiosis uolu
 ptatibus animum ita abdicetis, ut in earum despicientia
 magnam uoluptatis partem constituatis, Ita fluxas & for
 tunae ludibrio subiectas opes aspernemini / ut nihil magis q
 animoru lucrum / ad quod summa dimicatione deberis con
 tendere / & Christianam paupertatem ueris diuitiis annu
 meretis, Ita fallacem hanc gloriam excremini / ut eam so
 lam quae in rerum benegestarum claritudine / & magnis de
 ecclesia meritis sita est / non secus amplectamini / q ut eam
 rursus in preceptorem referatis, Ita uitam omnibus natu
 ra carissimam / ipsi natura superiores / paruifaciat / ut eam
 pro salute subditorum profundero non formidetis. Sic
 enim non modo ex rerum externarum omnium sollicitu
 dine & affectu / sed ex sui etiam amore abundum esse non
 dubitatis. Cuius rei cum ex scripturarum fontibus locu
 pletissimam exemplorum copiam hauriat / duo tantum
 paucis attingam quae ad illustradam apostolicam functio
 nem / potissimu spectare uidentur. Paulus enim quo nemo

B

efficacius Apostolica munia expressit / tanta fortitudine
affectum sui euicit / tanto zelo fratres prosequutus est / ut
anathema pro eis a Christo fieri optauerit, & cū gentium
esset Apostolus/ita ministeriū Apostolicum amplificauit/
ut ad earum emulationem etiam sanguinis cognatiōe iun-
ctos/non sine capitis periculo allicere studuerit. Et (ut an-
tiquitatem illam qua Christiana pietas adumbrata est nō
præteream) Moses in quo Apostolici muneris species relu-
xit/in tantam sui obliuionem deuenit / ut pro salute gentis
sue deleri e libro uitæ uoluerit. Tanto animi splendore/
tanto robore/tanta caritate/ uestram dignitatem insigniri
oportet. Sed præterea hoc Christum a uobis expetere
facile colligitis, ut mare secum transeatis, id est summopere
ad hoc incumbatis, ut malorum omnium in Christianam
Remp. insurgētium tempestatem & inundationem/nunc
maxime seuientem / magnitudine animi & tolerantia su-
peretis, & omni fortunæ impetu / omniq; formidine supe-
riores, nullo malorum genere ab euangelici muneris fun-
ctione deterreamini, sed ad omnia pericula principes uos
præstetis. Quod Apostolos omnes fecisse/cum turbulen-
tius erat fidei negotium / Mosē uero prælusisse nouistis,
qui cōtemptis persecutionum & aduersitatum omnium
procellis/per mare perq; inuiam solitudinem electum Dei
populum duxisse legitur. Porro hic ut olim Mosē/mox
Christum/nunc uos patres Amplissimi/& te potissimū Bea-
tissime Pater / sequitur / ab ore præsidiiq; uestris penden-
atq; hoc expectans/ut insipientibus in agistros/cæcis duces/
egrotis animis medicos/errabundis pastores/dissidentibus
iudices/omnibus patres uos ipsi præbeatis, eosq; præstetis/
in quibus religionis uenustatem/pietatis simulachrum/ca-

timonie specimē/humilitatis decorem/ uirtutum omnium
 speculum aspicientes/uestri potissimū imitatione erudian-
 tur. In cuius formam qui Apostolos agitis/secum in mon-
 tem Christus subire uoluit. Montis enim nomine intelli-
 gitur cœlestium mysteriorum sublimitas/quam uerbo do-
 cetis, Æternarum rerum meditatio, ad quam exemplo tur-
 bam instituitis, perpetuarum deniq; uigiliarum specula, in
 qua pro grege excubias agitis, ut tempestatem siue ab ho-
 minum iniuria, siue a dei uindictam imminentem, ex alto
 prospicientes, sonitu buccinæ populum moueatis, & in-
 star Mosi orationis præsidio armetis, qui in colle precatio-
 ni deditus israelitis obtinuit, ut clementissimi dei benigni-
 tate hostiles copias delerent. Hæc nimirum cōmunia sunt
 Apostolorum & uestra officia cōmunesq; uirtutes de qui-
 bus ex euangelio dicendum fuerat. Nunc quod ex eo super-
 est de precipua ecclesie procerum functione quam breuif-
 sime absoluiam.

Ecclēsticæ dispensationis imago, quam in diuinis li-
 bris contemplamur patres amplissimi, uos Christianę
 familiæ ad hoc fidos prudentesq; æconomos præfectos es-
 se declarat, ut Euangelicæ doctrinæ cibum a Christo diui-
 nitus auctum, hoc est ad multorum salutem uobis creditū,
 instar Apostolorum in eam distribuat. Vestrum enim
 est paruulis, & iuxta sæculum humilibus ac abiectis, quibus
 deus archanorum suorum profunditatem aperire digna-
 tur, efflagitatum panem larga liberalitate frangere, & ma-
 gna sedulitate cōmissum uobis gregem pascere, ne cum per
 uerso illo seruo qui talentum quod pro Apostolico sibi in-
 cumbente officio lucro & usuræ exponere debuerat, in ter-

ram defodisse legitur, seuera increpationis iudicium subire cogamini, nimirum quia illud præterieritis, quod non minus ad omnium salutem quam uestram functionem, pertinere dignoscitur. Panis enim diuinæ sapientiæ ab authore salutis traditus, si quando in intimos animorum recessus traieicitur, fide eos transformat, in deorum immortalium consortium rapit, & diuinitatis participes efficit. Quem pro Apostolico muere ab omni sinistra interpretationis, & hereticæ deprauationis letali ueneno in natua & salutari puritate seruatum, in electos dei filios dispensare debetis. Quod quidem (ut innumera testimonia præteream) ex eo facile prospicere possumus, quia (uti apud prophetam est) qui cœlestem hanc scientiam negligit, sacerdotii functione indignus a deo repellitur, quodque Paulus Timotheum ab infantia sacris literis instructum, eo nomine dignum euangelico munere cōmendat. Id quod ut exacte præstare possent, Episcopos qui soli deo militare debent, a profanarum rerum administratione liberos esse uoluit. Quam obrem olim ad amplificandam ecclesiasticæ functionis dignitatem, Apostolico decreto sancitum legimus / ut qui ad eam admitterentur, prius ab humanis literis & scientiis, quibus hæcenus sat operæ nauarant, ad diuinam hanc philosophiam studium animumque traducerent. Fieri enim non potest, ut qui cœleste hoc pabulum a Christo non acceperunt, ueros pastores præstent, si quidem is solus illud largiri potest. Vnde & Moses cum manna illud mysticum non certe aliud quam Christianam doctrinam Apostolica functione dispensandam præferens cœlitus depluisset. Hic inquit est panis quem Dominus dedit ad uescendum. Vobis igitur quos suæ familiæ æconomos Christus præposuit, in

hoc incumbendum est, ut ea faciata, spiritualium ciborum reliquias ne pereant, & instar mannae illius cōputrescant, colligatis, & summa ueneratione obseruetis. Nam in dominica mensa, cui ministratis, neq; apex unus, neq; fragmentum proponitur, quod non singulare in Apostolici muneris functionem exigat. Cuius cum penes te Beatissime Pater summa tota consistat, tuoq; nutu & imperio dirigatur, in Christianū populū, qui incredibili auiditate tuam clementiam sequitur, maiestatemq; adorat, oculos attollere dignaberis. Is enim longa inedia fractus, & peregrinationis huius molestia fatigatus, idē a te quod olim a Christo, nempe alimoniam consolationemq; certa fiducia expectat. Quam a te facile adipiscetur, qui uerbi Dei ministerium inter Apostolicas partes maxime desideratum, suprema euangelici muneris functione & autoritate, qua orbem totum complecteris, per fidos delectosq; distributionis huius ministros foeliciter propagabis, ut Resp. Christiana que eo coaliuit aduersus subdolas hereticorum imposturas, & infestos paganorum insultus in stabilitate persistat. Quam ut domi forisq; afflictam & oppressam, in ueterem dignitatem & libertatem reuoces, Deus Opt. Max. consiliorum tuorum moderatorem, & animi tui sapientissimi confirmatorem se tibi præbeat, Ac post diuturnam hilaremque senectam, purpuream immortalitatis rosam largiatur.

EIVSDEM DE REGNO CHRISTI

Oratio Coram ipso Paulo .III. Pontifice

Max. & Reuerendissimorum Car

dinalium confessu, Domini

nica. 4. aduentus an

ni. 1535. habita

S I iis de rebus quæ humanum terrere solent ingenium, exacte dicendum esset. B. P. æterno & insuperabili regno Christi cuius in euangelice lectionis serie speciem non obscuram intueri licet, non postremas orationis partes tribui debere facile existimarem. Quorsum enim antiquum illud Romanum Imperium ad omnes mundi regiones propagatum, uetus sacerdotium ad nouæ legis radios occidens, uox in solitudine clamantis, & diuinum Esayæ uaticinium, nisi ad regni Christi magnitudinem exprimendam, celsitudinem firmandam, dignitatē deniq; instaurandā attinent? Quæ pro excellentia & copia rerum, quicumq; absoluta dexteritate sit explicaturus, scientiarum omnium fontem, & totius eloquentiæ torrentem, ab immortali deo sibi dari merito optauerit, Ego uero, cum dicendi munus mihi incumberet, idq; ad immensum huius materiæ pelagus conferre statuissem, admodum ueritus ne conatum successus destitueret, hoc solum mihi faciundum proposui, ut e multis pauca quædam obiter attingam. Quamobrem tua clementia. B. P. qui proximus Christo sedes in regni solio, ac uestra beneuolentia fretus cæteri huius regni clarissimi principes, diuini numinis præsidio rem ipsam aggrediar.

CUm supremus ille rerum opifex uniuersam mundi fabricam/summa & incōprehensibili prouidentia inhabitet moueat & disponat, regnū in ea quoddā statuisse uideatur, quod ab immutabili eius consilio totum pendeat, & diuinam quandā uini ceu numē aliquod occultū exprimat. Verum etsi immensa dei maiestas cōditis rebus ipsis inesse dignoscitur, non tamen eadem in omnibus ratione sedem constituisse creditur. Nam quæ intelligentiæ sunt participes iis dumtaxat uiuam diuinæ naturæ similitudinem, de suæ mentis Archetypo impressit. Quos uero ante mundi originem delectos, tandē inuisibili semine mirabiliter procreauit, iis intimum bonitatis suæ spiritū uelut præcipuum quendā amorē ingenerauit, & filium suū seruatorē omniū peculiari quodā iure in eis regnare uoluit. Quod cū cœlestia priscorū uatū oracula plerisq; modis astruerēt, crassum illud hebreorū genus, sceptrū Iudæ, soliū Dauidis, & regnū Christi quod a mundi præsidis robur haberet, animo uolabat. Verum tamen id aliud non esse diuinarū scripturarū testimonia subiudicant, q̄ delectum & gratū deo populum quem totius author salutis a patre sibi creditum ex seruitute in libertatem asciuit, atq; in ius suum uendicauit. O miram dei Opt. Max. clementiā meritis omnibus superiorē. O immensum inauditę liberalitatis beneficiū cunctis, obuium. O inexhaustum diuinæ bonitatis fontem/in homines mortales effusum/quos humi repentes immo ad humū ipsam properantes/in deos transformauit/& regnum suū cœleste & spiritale esse uoluit. Nam & in exodo qui uoci immortalis dei paruerint pactumq; eius seruauerint/regnū fore dicuntur. Et alibi uiginti quattuor seniores clementissimo regi Christo gratias agere describuntur/q̄ eos sanguī

ne redemptos/non solum in regnum delegerit, uerumetiam regnandi super terrâ eximia potestate donauerit. Quippe quos liberam & regalem uitam agentes/compressâ hostis nequissimi tyrannide/in ipsa etiam militia regnare uoluit. Sed quia hac de re non nisi ut euangelico sermone exprimitur/agere constitui/ad euangeliũ ipsum fluat oratio.

Tiberio Cæsare quintumdecimum imperii annum agēte/& Anna atq; Caypha principatu sacerdotum fungentibus, factum fuisse uerbum domini super Iohannē Zachariæ filium in deserto Lucas testatur. Qui gloriosissimũ Christi regnum descripturus/ueteris Romani imperii meminisse creditur/ut alterum alteri conferens eorum differētiæ ac similitudinis rationem, intelligentiæ nostræ proponeret. Nam (ut interim Christianum imperium silentio prætereā) antiquum illud omnino caducum erat, & breui interitum, Regnum uero Christi solidum & æternum, illud ferro uolentiaq; partum, hoc lenitate clementia & mansuetudine quesitum, Illud uanis mundi præfidiis innixum/hoc cœlestis patrociniũ robore firmatum, Illud legibus humana proditis industria administratum/hoc decretis e diuinæ mentis archano depromptis stabilitum, Illud ad modicam Reip. trāquilatē & perituram mundi fœlicitatē contendens/hoc ad eximiam Christianę uitę pietatē & inexhaustũ uerę beatitudinis fontē prouehens. In hoc tamen utriusq; discrimine hanc etiam utriusq; similitudinē perspicimus/q; ipsius Romani imperii coruscante uictoria, Christi quoq; regnum omnes mundi nationes siue ad interitum pro humanorum operum merito/siue ad salutē pro immenso diuini muneris beneficio / sibi uendicare

dicare cœpit, & illos quidē ad iusti iudicii carcerem/hos uero ad misericordiæ regnum rex ipse pertinere uoluit : quos unius lauachri mysteriis iniciatos/ uno uerbo uegetos/uno spiritu fœcundos/ad unam supremi patris hereditatem uocatos/in unum regni corpus insitos credimus. Non tamen propterea omnes hic dignitate aut officiis pares esse putemus, Quod si qui impia temeritate & temeraria impietate omnia confundere molientes assueuerare non uerent. ii in spiritali perinde ac mundi regno uarios ordines & suā cuiq; dignitatem esse debere animaduertant. Alioqui si sacra & prophana omnia permiscuerimus/& ecclesiasticum statum & disciplinam sustulerimus/quid aliud quæso erit regnum Christi q̄ cōfusa quēdam hominum turba inter se tumultuantium suoq; arbitrio uiuentium. Possem ad hoc innumera scripturarum testimonia producere/unicum tamen & quidem irrefragabilem Apostolum Paulum sufficere arbitror/qui ipsum Christi regnum mysticum quoddam ceu corpus constituens/membris in eo singulis officia singula distribuit. Alios enim qui religioni & sacris præsent/ alios qui ciuili hominum societati præsideant/ alios deniq; qui his uti decet/obtemperent/esse oportet. Ex iis autē primum illum eundemq; supremum ordinem hierarchicū esse perspicuum est/ In quo post summum ecclesiæ hierarcham/præfides & senatores ad hoc diuinitus uos constitutos memineritis P. Amp. ut dei uoluntatem populo referatis, ipsos mundi principes sapientiā in mysterio reconditā doceatis, euangelicā libertatē & publicā salutem tueamini uosq; uita simul & doctrina eos præstetis ut Christiani principes qui in proximo regni ordine primatum obtinent, uestra sequentes uestigia regnum ipsum seruare & propagare

non desinant. In hoc enim illi unguntur & consecrantur, ut ad supremi regis gloriam militare studiū conferant. Is etenim (ut ad Euangeliū reuertamur) regali hebreorū sceptrō, ad alienarū gentiū tetrarchas præsidesq; translato, legis sacerdotiū aduentus sui splendore obscurauit, & romanū imperiū multiformi Danielis statua designatū contriuit, hoc est a patriis legibus & ritibus in suā religionē suaq; decreta pertraxit, & inuisibili diuinitatis luce perfusum, totum seipso maius & illustrius effecit, ut regnū suū ab æquo iustoq; deuium legibus, & institutis formaret. Quod ex proxima euangelii parte q̄ paucissimis explicare conabor.

Mirificum illum regis eterni præconē Iohannem Zachariæ filium una cum Esaia oraculo, in restituendę Christianę Reip. speculū uobis propositū uidetis. P. Amp. Qui non in aula regia ubi luxu diffluere & opibus splendēre potuisset, sed in solitudine Moſen & Helyam referens, incomparabile uerbi dei munus accipere & dispensare promeruit. Quo fit, ut imprimis humanarū rerū contemptum & dignā uestra auctoritate uitā, ac euangelicū ministerium magnopere uobis cōmendatum intelligatis. Deinde non temere testimonium Christo daturus in mediū profiliens, ambitionē omnē qua nulla in regno Christi pestis exitiālior esse potest, aperte damnauit, ueniensq; in omnē regionem Iordani finitimā nunc legis rigore terrorum fulgura iaculans, nunc euangelii gratia cunctis qui pœnitudinē facto exprimerent flagitiorū condonationē adnuncians, ac modis omnibus ad Christū excitans uobis quoq; id oneris incumbere subindicauit. Post hæc autē ut ecclesiæ præsules & ipsos cū primis Episcopos in quibus omnis diuinarum

legum incirtia perniciosissima est, ab ocio & luxu ad sacra
 rû literarû studia reuocaret, ex Esaya testimoniû proferre
 non dubitauit. Quo & inanem uulgi de se opinionem cor
 rexit & ministerii potius q̃ dignitatis habendam rationē
 docuit. Scriptum est (inquit) in libro sermonû Esaye pro
 phetæ. Vox clamantis in deserto parate uiam Domini re
 ctas facite semitas eius. Omnis uallis implebitur & omnis
 mons & collis humiliabitur, & erunt praua in directa, &
 aspera in uias planas, & uidebit omnis caro salutare Dei.
 Non aliud (ait) esse me arbitremini q̃ uocem in deserto cla
 mantis, fide peruium facite animû euangelicæ pietati, qua
 Christus recipitur, & obliquas cogitationû & operû semi
 tas ad rectitudinē componite. Quod cû ad omnes ad uos
 tamen præcipue quibus aliena credita salus est, spectare scia
 tis, cauendum animaduertite, ne pestilenti exemplo uel in
 curia aduersis potestatibus non Christo ad subditos iter
 struatis. Valles quidem, id est humiles sibiq; diffisos & di
 splicentes animos uestro ministerio diuinæ plenitudinis
 participes Christus efficiet. Montes uero, hoc est, turpitu
 dinis uel facinorû audacia, generis uel fortunarum iactan
 tia, legis aut sacrificiorû fiducia, tumidos humiliabit. Itaq;
 uobis qui summo ipsi hierarchæ assidetis inspiciendû esse
 Iohannes ostendit ne prodigiosa quædam scelera in altitu
 dinē montium excrescant, regnetq; in regni Christi proce
 ribus, pro religione impietas, pro caritate odiû, pro bene
 ficientia cupiditas, pro moderatione superbia, & luxus, pro
 ecclesiastica disciplina perniciosa libertas. Cæterû summo
 pere curandum esse monuit, ut sic praua omnia & tortuo
 sa quæ ipsum Christi regnum deformant rescindantur, ne
 quid sit in eo preposterum, ne regni insignia sine uirtutum

meritis teneantur, neue ecclesiæ defensio ambitionem, ius
uiolentiam iusticia tyrannidē, sanctimonia superstitionē,
pietas quęstum iniquo prętextu operiant. Ita denum ad
aspera omnia cōplananda manum admoueat. ut immo-
deratam omnem seueritatem cum lenitate & mansuetudi-
ne commutetis. Quo fiet, ut rex ipse in quo omnis huma-
næ salutis sita spes est, omni homini, qui sine dei spiritu ni-
hil nisi caro est, conspiciendum se prębrear, totumq; regnū
suum omni malorum sentina purgatum in suam dignita-
tem restituat. Hæc omnia eo tendunt P. Amp. ut uestre di-
gnitatis rationem rebus in omnibus habeatis, qui in glo-
riossissimo Christi regno uelut lucentissima, in cœlo sidera
nocturnam errorum caliginem dispellere, & cœlestes illos
spiritus imitari debetis. Quemadmodum enim illi immor-
tali deo proximi, reconditæ ueritaris lucem & diuini amo-
ris æstum in alios transfundunt, ita nimirum & uos supre-
mo hierarchæ semper assistentes, receptum ab eo euange-
licæ doctrinæ fulgorem & flagrantissime caritatis influ-
xum, ad ceteros regni ordines transmittere studeatis. Tu
uero .B.P. qui regni Christi sceptrum & clauēs diuinitus te-
nes, totius orbis moderatorem te esse re ipsa declaras, cuius
immenso maiestatis culmine, sicut nihil sublimius esse cre-
dimus, ita nihil fœlicius experimur. Tuo namq; potissi-
mum tempore duos regni Christi ordines, ecclesiasticam di-
co hierarchiam & Christianum Imperium, duo maxima
mundi lumina, ita coniuncta uidemus, ut nihil quod ad au-
gendæ Christianæ Reip. studium attinet, desiderari possit.
Quo sit ut sperare liceat integerrimi & sapientissimi ani-
mi tui uirtute & magnitudine breui futurum, ut regnum
ipsum cum pristino splendore, optata ubiq; terrarum &

gentium suscipiet incrementa. In hoc enim tantæ celsitudinis fastigio & felicitatis cumulo constitutus, reges ac ceteros principes quos domi concordēs & foris strenuos esse decet, in felicissimo pacis studio conserues, & ad rerum præclare gestarum imitationem modis omnibus hortaris, ut dum illi externa mala depellunt, tu Iohannem imitatus domestica deturbes, Atq; omnibus ad euangelicæ ueritatis trutinam pensatis, bello huic intestino quo ecclesiam discerpi & religionem periclitari uidemus, finem imponas. Quo fiet ut regnum ipsum quod nos sumus, sudore & sanguine quesitū, nō modo sis conseruaturus, uerū etiam propagaturus, ad Dei Optimi Maximi gloriam & perpetuum nominis tui monimentum.

EIVSDEM DE GLORIA CIVITATIS

novæ Hierosolimæ oratio Coram ipso Paulo
Tertio Pont. Max. & Reuerendissimo
rum Cardinalium confessu, Domi
nica. 4. quadragesimæ an
ni 1536. habita.

Væ religiosis hodie sacrisque ceremoniis in ocu
los omnium, conspectumque exposita sunt. B.
Q. P. incredibilem quandam læticiam mentibus
ingerere videntur. Nam (ut alia huius diei
mysteria silentio præteream) Paulus ille gen
tium doctor egregius, incomparabilem novæ ciuitatis hic
rosolimæ gloriam, hodierna doctrina proposuit. De qua
succincte pauca dicturus, nō solum animo cōmoueor uerū
etiam toto corpore perhorresco. Neque enim is sum qui tan
tæ rei copiam eloquentia consequi, magnitudinē doctrina
æquare/nodos oratione dissoluere, pondus denique uiribus
sustinere possim. Huc accedit diuinissima loci huius autho
ritas & altitudo, ad quā nulla ingenii ubertas, nulla dicendi
uis assurgere ualeat. Quare ut ipsius rei difficultatē immi
nuā, inter sex millia quæ dicenda, demonstrāda, explicādaque
essent, ea solū attingā quæ hodiernę fuerint Epistolæ uici
niora. Interim languidas animi uires eriget istud tuum pe
ctus apostolicæ pietatis & clementiæ locupletissimum, ue
straque omniū testatissima humanitas. Qua subleuatus di
cendi exordium statuo.

R. Es admodum exigua, facile uideri posset ciuitatis cui
uspiā descriptio P. Amp. si eā non potius diuinę con
silio sapientię, quā humanæ mentis industria & ratione meti

remur. Noua uero hæc de qua loquimur hierosolima, omnem humanam uim & cogitationem exuperat. Huius enim si altitudinem intuemur, non modo cælum uertice attingit & sublimes illos spiritus sinu cõplectitur sed etiam intimos inferorũ recessus præsentia & robore penetrat. Si latitudinem perlustramus, mœnibus defendi non circumscribi, finibus omnia claudere non finiri, continere cuncta a nullo contineri potest. Si denique magnitudinem omnem attēdimus, quicquid ei contuleris augustum exiguumque uidebitur. Hæc e patrio regno defiliens omnes orbis regiones, nationes omnes inaudita & incõparabili uirtute permouit, Imperiisque ac uictoriis & triũphis clara semper & inclita, ferocissimas gentes, potentissimos populos, fortissimos reges, & inuictissimos Imperatores sibi subegit. Hanc Iohannes ille cœlestium archanorũ conscius, sanctam & nouam descendente e cœlo a deo paratam sicut sponsam uiro suo adornatam, se uidisse testatur, quam & Paulus gloriosam & omnis macule ac rugæ expertam descripsit. Ea siquidem supremi patris nata sinu cœloque conscripta, cum auiti generis splendore & cœlesti doctrina ac potestate in terras delapsa est. Quæ adeo sancta est, ut prophanari non timeat, noua ut uetustatis incõmoda non sentiat, Adeo parata, ut uilescere nequeat, Christo desponsata, ut errare modo aliquo non possit. Huius gloriam Paulus insinuans, quod non ad tractabilem ignem turbemque, sed ad ciuitatem dei uiuentis regenerati accesserimus, fidentissime gloriatur. Quæ ueterem illam hierosolimam in uero Christi & prophetarum cruore conspersam, quantum excedat, facile explicari non potest. Illa enim angustissimis clausa finibus, uni dumtaxat genti dominabatur, hæc uero per latissimas omnium terrarum regiones diffusa, populis fere om-

nibus & nationibus imperat, Illa sepe numero sub alienis gentibus & regibus intolerabile seruitutis iugum sustinuit, hæc ubiq; terrarū & gentiū perpetua spiritus libertate gaudet, Illa in captiuitatē redacta & innumeris calamitatibus contrita succubuit, hæc si quando aduersitatibus percussa fluctuauit, omnibus semper ac ipsis etiam portis inferorū præualuit, Illa cū sua religione & lege interire debuit, hæc nullum habitura finē ad immortalitatē quā proxime accedit. Hæc sane est cœlestis illa hierosolima ex ignitis uiuisq; lapidibus extructa, summo angulari lapidi uelut unico fundamento innixa, ceu immobile ueritatis firmamentū erecta, angelorū præsidiis ueluti muris circumsepta, apostolorum quoq; & uestris P. Amp. custodijs uigilijs excubijsq; credita. Dixi summatim multa, pauciora tamen q̄ debui, plura q̄ institui, non alia q̄ quibus ad intelligentiam Pauli opus esse perspexi, ad quem se uestigio iam propero.

Paulum Apostolū Sarræ & Agar imagine, mōtis Sine & hierosolymæ specie, superstitiosam hebreorū Sinagogam & religiosam gentiū ecclesiā figurasse audiuiſtis P. Amp. Cuius allegorię inuolucro duo testamenta duosq; populos, inter se dissidentes, & ad hereditatē diuersis uis contententes, haud dubie contineri intelligimus. Quorū alterum ad ueterē & seruituti obnoxiam, alterū ad nouam & liberam hierosolimā pertinere legimus. In hac uero innumeras gentes, eximia testamenta, inuiolatā ciuitatis libertatē, locupletissimā deniq; hereditatē intueri licet. Quorū omnium uel curā uel dispensationē uobis delegatā nouimus. Omniū namq; populorū uobis credita salus est, quos aut domi quietos seruare, aut profugos uel extorres colligere, aut alienos ad cōmunem omniū ciuitatē cuius custodia uobis

bis cōmissa est, non minus bene beateq; uiuendi exēplo, q̄
 salutari doctrina adducere debetis. Sed & duo testamenta
 hoc est legis & Euangelii, maximi muneris loco accepistis,
 quo illud quidē carnis quā dicunt, hoc spiritus, illud operū,
 hoc fidei illud formidinis hoc amoris illud seruitutis hoc li-
 bertatis est. Quæ ita dispensanda esse non ignoratis ut in-
 firmorū animos ab illo paulatim ad hoc tanq̄ ad summum
 perfectionis gradum instituatis. Ad hæc Paulus ciuitatem
 ipsam insigni quadam libertate illustratam esse affirmat.
 Illa (ait) quæ sursum est Hierusalem libera est. Illa (inquam)
 non quæ humo affixa est, & perpetua cum filiis ciuibsq;
 suis seruitute premitur, sed quæ ad cœlestem & diuinam
 suā originē, animo & cogitatione rapitur, summa spiritus
 libertate potitur. Hanc uero libertatem in hoc sitam esse
 sacrarum scripturarum testimonia demonstrant, ut a legis
 onere, tyrannide, seruitute, & preuaricatione, liberi uera ca-
 ritate omniq; pietate perficiamur. Non enim a legis disci-
 plina & obseruatione a qua & Paulus minime liberum se
 esse testatur, sed a iugo legis, & dira execratione, nos Chri-
 stus exemit. Impii ergo & sacrilegi quidam qui delubra de-
 moliri, & sacra omnia contaminare non uerentur, Euan-
 gelicam libertatē frustra nobis obiiciunt. Quasi uero in
 hoc ipsa consistat ut extra omnē legē pro uestra uolunta-
 tis dispositione uiuamus, & Christianā libertatē ad arbi-
 trii nostri libidinē detorqueamus. Quin potius ut lege in-
 structi & formati, summota legis seruitute ad caput legis
 Christū, summumq; uirtutis apicem libere proficiscamur.
 Non enim obstricto seruituti animo, sed mente libera ad
 cœlestem hereditatē uere cōtenditur, In cuius rei argumen-
 tum Hismael ancillæ filius id est seruili animo legi obno-

xius, ab hereditate repellitur, quam Isaac ex libera procreatus hoc est mente libera legis obseruationi deditus adipiscitur. Quamobrem uobis quos aliorum doctores & pastores esse oportet, in hoc neruis omnibus incumbendum est, ut uestris legibus, institutis, & exemplis eruditi, non ancillę sed liberę, non carnis sed spiritus, non legis sed promissionis, non ueteris sed nouę hierosolimę filii & ciues euadamus. De cuius immensa magnitudine ac incomparabili pulchritudine & gloria plurimas inestimabilesq; dicendi rationes mihi propositas esse uideo, quę ut uix ulla ingenii felicitate attingi ita & pro temporis angustia explicari non possunt. Quare ex innumeris quę sese dicenda offerunt, ad copiosissimam splendidissimamq; ciuium propagationem breuibus explicandam me conuerto.

EXimius ille cęlestium mysteriorum propagator Paulus Apostolus, gloriosissimam ciuitatem de qua nobis sermo est, omnium amplissimam & incomparabili ciuium propagatione copiosam esse testatur, cum eam omnium parentem adpellare non dubitat. Peperit sane ab origine mundi parens ipsa fecundissima, nouas principi & sponso suo Christo & fere innumeras creaturas, totq; sinu fouet quot orbis ipse maximus uix capere sufficiat, felices nimirum uos o tantę parentis filii, feliciores ciues, quorum numerus modum excedit, quorum splendor omne deus exuperat, qui sic in amplissima ciuitate degitis, ut nulla sedium angustia clausi, latissimas regiones perlustrare possitis, atq; ita in spaciosissimam uestre unius patrię latitudine uersamini, ut in una semper ciuitate esse uideamini. Quis explicare queat, qua caritate quibusue officiis ciuitatem, quo studio quoue amore patriam, qua deniq; pietate

parentem hanc prosequi conueniat, cui fidem & religionem qua diuinitus inbuti sumus acceptā referre debemus? Quis insuper leges sanctissimas, æquissima iudicia, sapientissimos magistratus, regiam libertatem, eximium splendorem, præclara munera, & diuinas prope dignitates pro meritis enarrabit? Sed redeo ad Paulum qui Esayæ testimonio desertam olim & sterilem gentium Ecclesia copulata uiro Sinagoga filiis ciuibuscq; fecundiorē esse affirmat. Quos Christus Princeps æternus cateruatim ad se properantes unam ipsam ciuitatem cui nichil præsidii & rerum ad ueram uereq; Beatam uitam pertinentium deesset magna sedulitate collegit. Et ut uerum ac prouidum ciuitatis cuiuslibet principem in alendis fouendisq; ciuibus summo pere liberalem esse decet, cum alias semper, tum præsertim hodie se omni ex parte munificum exhibuit, dum afflictum inedia populum (ut hodierna Euangelii narrat hystoria) mirabili & inaudita liberalitate refecit. Idq; officium præstitit, quod a uobis quos in sua ciuitate pastores & Episcopos constituit, omni iure expetit. Nempe ut non modo Euangelicam doctrinam, cuius ministerium uobis delegauit, uerum etiam Ecclesiasticas opes quarum dispensatores uos esse uoluit, in uestros ciues dispensetis. Neq; enim ubi liberalis est Princeps œconomum tenacem esse conuenit. Quare ne eximia principis liberalitas ob oculos uobis posita uestram uel parcitatem uel illiberalitatem merito condemnnet, occurrere debetis. Hæc omnia uos potissimum respiciunt P. Amp. Nam uos in lucem quæ ipsi nouæ ciuitati sponsæ suæ semper affulgeat Christus ciuibus aliis uos ceu procures ac uere primates præesse constituens, erexit. Itaq; ne quā illa caliginē induat, magnopere curandū est.

Si enim lumen quod in uobis esse debet, uertatur in tenebras, ipsæ tenebræ quantæ erunt? Salem quo Euangelicæ doctrinæ cibus ad salutē ciuium suorum cōdiatur, a uobis exigit, quapropter ne intereat ille aut dilutus fiat diligēter prouidendū. Si nāq; sal euāuerit in quo salietur? Ipsam in monte ciuitatē omnium cōspectui expositā uos præcipue esse uoluit. Vestræ igitur uirtutis erit ut in altitudinem uestram omniū oculos, quos fugere nō potestis, coniectos emineritis, eosq; uos semper præstetis, qui in communi omnium ciuitate, in quo positi estis principē locum merito tenere uideamini. Ad te tandē conuertor. B. P. qui cū in medio lapidū ignitorū sedens maximū ciuitatis Hierosolimæ pōdus sustineas, eū te in seruādis augēdisq; rebus exhibeas, ut nihil quod ad optimū principē attinere ualeat in te desiderari possit. Quō fit ut non modo ciues alii nouæ huius Hierosolimæ uirtutis tuæ magnitudinē admirētur atq; suspiciant, sed etiā ipsi qui proxime tibi assident optimates tui, te ut parentē ex animo uenerentur & colant, ac te huic sancto regimini p̄esse diutissimeq; uiuere merito exoptēt. Id enim certa fiducia omnes a te expectant, ut qui summa sapientia & foelicitate creditā tibi à Christo Hierosolimā in trāquillo statu hactenus seruasti, eā subortis quibuscūq; malorū procellis subleues, diuinæ lucis fulgore perfundas, cœlesti rore fœcūdes, numero ciuium augeas, collectis lapidibus instaures, salubri deniq; alimonia ac speciosa spiritalis lēticię rosa foueas ac semper exhilarēs. Quæ omnia quia diuini esse muneris nō ignoramus, deū Opt. Max. oramus ut sanctissimis cōsiliis tuis adesse optimosq; conatus tuos ope sua prosequi & stabilire nō desinat, tibiq; quod assidue optamus & precamur longeuā foelicemq; uitam cōseruet.

15

EIVSDEM DE DIGNITATE HOMI-
nis oratio Coram ipso Paulo . III. Pont. Max.
& Reuerendissimorum Cardinalium
confessu, in die cinerum an-
ni . 1537. habita.

Vi hodiernam dicendi prouinciam obire so-
lent. B. P. eam ad calamitosam mortalis natu-
ræ conditionem, intimamq; sui inspectionem
conuertere consueuere. Horum ego studium
non tam Ecclesiasticis hodie sacrisque ritibus q̃
innumeris scripturarum sententiis quæ hominem rem esse
uiribus, ueritate, uitaq; ferme destitutam, ac imbecillitati
uanitatiq; abnoxiam attestantur, haud dubie commen-
dandum arbitror. Nam & apud Euangelicum illum Æsa-
iam, Ægyptum hominem non deum, carnem non spiritū,
& in plerisque aliorum uatum oraculis diuinisq; eloquiis, ho-
minem modo terram, puluerem, & cinerem, modo scenum
& abiectissimum quid adpellari comperimus. Quæ omnia
ad eam qua homo a se pendere inq; se consistere falso existi-
maretur, rationem, & ad infoelicem ex primo parente ori-
ginem, qua natiuam peccandi uim atq; libidinem & mala
omnia traximus, non ad Dei Opt. Max. bonitatem qua
omnibus aliquam suæ naturæ lucem ceu numen infudit, re-
ferenda esse nouimus. Quamobrem operæ precium me
facturum esse putauī si hoc mihi delegatum, non ultro sus-
ceptum, enarrandi potius q̃ orandi munus, præter ea ad
mirabile hoc immortalis Dei opificium breuibus exten-
dero.

ET si cœlestes illos spiritus eminentioris naturæ, tum dignitate tum foelicitate, rebus aliis præstare non dubitamus P. Amp. hominem tamen diuinum esse opificium, cœteris maiore dignum admiratione facile existimauero. Cum enim res alias aut spiritus omnino, aut corpora prorsus esse putemus, solum hominem ex spiritu simul & corpore, illo quidē cœlestis, hoc terrestris naturæ, perpetuo amoris uinculo iunctis, mirabiliter constare uidemus. Quo fit ut quæ maxime distare nouimus, ignem ac cinerem, spiritum ac puluerem cœlum ac terram, in unum coire non sine admiratione, conspiciamus. Huc accedit q̃ incomparabile hoc opificium aduersis lationibus obnoxium esse, id est sursum deorsumq̃ ferri intuemur, dum animo illud ad cœlestem & supernam originem contendere, corpore uero ponderosam infimamq̃ terræ molem petere uidemus. Verum alia quæ magis suspicere debeamus in diuinis libris recondita animaduerto. Eximius enim ille cœlestium mysteriorum scrutator paulus hominem qui nouus ac spiritualis omnino conditus, a natiua dignitate in maximi dedecoris sentinam sese præcipitauit, rursus erectum at non prorsus restitutum, unum ex duobus iisdemq̃ integris hominibus, spiritali scilicet & corporali, nouo & ueteri constituit. Qui cum a se mutuo semper dissideant eundem plane hominem qui totus uterq̃ est, perpetua eademq̃ foelicißima secum militia certare, eoq̃ fieri intelligimus ut discordia quæ cœtera labefactari solent, mirabile illud opificium in uita seruetur, quod alioqui caduco mortaliq̃ immersum corpori, sua secum pace & concordia interiret. Ex eo autem fit ut in hoc mutabilis uitæ curriculo id ipsum semper ac simul stare & cadere, uincere & succumbere, adolescere & interire,

fateri debeamus. Et quod assidue optandum est, ueteri labente nouum consistere, illo cedente hunc triumphare, illo senescente hunc iuuenescere, illo marcente hunc florere, illo emoriente hunc potissimum uigere sentiamus. Quo circa non absre pro seruanda uita atq; salute nos ipsos ad mortem atq; interitum adigere, nihilq; nisi quod non nostræ naturæ, sed diuini est muneris, in nobis integrum relinquere, ac proinde uitam morte, salutem interitu, strenue tueri cogimur. Quo sane fiet ut insignem & gloriosam dei uictoriam memorabili gedeonis facto confodientibus sese multo hostibus adumbratam, in nobis experiamur. Porro si ueterem illum in nos dominari contigerit, quod utique archano diuinæ dispositionis ordine, uel ad iudicium pro humanæ uitæ merito, uel ad salutem pro gratuito dei beneficio semper fieri non dubitamus, non perinde ceu omni spe destituti animum despondere debemus. Sed quemadmodum Deus priscis mulieribus quibus sterilitas opprobrio fuit, fecunditatem naturæ uiribus superiorem indidisse legimus, ita nimirum cum per impietatem corda nobis exaruerint, spiritum suum eis ingenerare, immo & lapides in filios Abrahæ, inq; nouam transformare creaturam & posse & uelle speremus. Itaq; nos ipsos inspiciamus oportet, qui si flagitiosi & impii fuerimus, ad ueterem dumtaxat, sin iusti ad ueterem atq; nouum, cum Euangelico illo Samaritano semiuuos nos pertinere nouerimus. Quippe qui nondum supremam pietatis metam attigerimus, sed imperfectam adhuc (ut ita dixerō) perfectionem assequutissimus. Quamobrem ut ueteri perempto & in partes conciso ac dissipato, qualem excoriata olim hostia & frustatim dissecta, mysticoq; altaris igne cōsumpta, prefigurauit, nouum

in dies renouemus, & magis semper magisque stabiliamus, summa dimicatione contendere debemus. Cuius rei expressam Euangelio formam intueamur.

Religiosam priscis illis patribus ieiunii, aut præscriptâ lege obseruatione aut adsumptam sponte uirtute, hodierno etiam posteris Euangelio cõmendatam uidemus P. Amp. Quæ nõ præcipue in delecto ciborũ genere, inq; præfixum protracta tẽpus inedia, sed in cõtinentia & uoluptatum deliciarũ luxurĩq; contemptu, ac iusta uitæ austeritate potissimũ cõstituta, uerã animi afflictionẽ pœnitudinẽq; testetur, atq; ita ueterẽ nouũq; hominẽ cõponat, ut illo languente hic cum ad omne pietatis officiũ omnẽq; uitæ functionẽ, tũ præsertim in subitis rerũ euentibus & aduersis casibus, ad sedulum precandi manus uegetus alacerq; euadat. Ob id siquidẽ non solũ illi ueteri hebreorũ populo sępenumero flagellis attrito & Christi Apostolis infœlice illa nascantis Ecclesię calamitate undiq; ad necẽ quęsitis, uerum etiam ethnicis iram Dei cœlitus expertis salutarẽ corporis castigationem cũ precatione peculiarẽ sacramq; fuisse legimus. Hanc uero totius author salutis (ut Euangelio exprimitur) nulla hypocrisi nullaq; simulatione aut mēdacio fucatam, uerũ uult esse merentis & ad deum suspirantis animi argumētum, ne si natiua uultus effigie defigurata ille intus per noxias cupiditates uoluptatesq; uerã ueteris hominis imaginẽ expresserit, falsam noui speciem propriæ uetustatis ueritate cõdemnet. Quia propter tu (inquit seruator) quẽ nõ ad humanũ conspectũ deformata corporis effigie, sed ad diuinũ intuitum reformata animi specie prorsus formatũ esse uolo, cũ ieiunaueris unge caput tuũ & faciẽ laua.

Caput

Caput namq; hoc est principem humanæ naturę mentem interim meroris gemitusq; acerbitate adflictam, spiritalis oleo leticię quod in aduersis perinde atq; in prosperis uultum exhilaret, animumq; confirmet delinire monemur. Faciem deniq; illam quam immortalis deus expressa diuinitatis imagine formauit, cœlestis gratię lauacro ab omni corruptorum affectuū sorde expurgare iubemur, ut homo noster qui iam non cœlestem patrem retulit, sed in terrestrem spurium degenerauit, recuperata cœlestis similitudine, pristinam nouitatem dignitatemq; recipiat, Externum uero illum humanæ consuetudinis uultum, cuius fortassis caligine aliorū facies obscurauimus, ita illustrare debemus, ut ex eo non nihil nostrę hoc est diuinę nobis inditę lucis aliorū oculis resplendeat, non ut humanæ laudis aut cōmendationis claritas nobis arideat. Seruator enim thesauros in terram eruginis & tinę demolitioni, furūq; insidiis futuros obnoxios, defodi uetat, inq; cœlo ubi nihil eorum metuitur reponi præcipit. Quo nō modo perituras opes in Christi membra dispensando ad cœlum transmittere, uerum etiam recte facta nō ad terrenā mercedē sed ad cœlestis patris gloriam, cuius gratuito muneri accepta referri debent, & a quo immortale premiū certa fiducia expectetur, sedulo conferre iubemur. Quod si secus fecerimus, cum thesaurus quocunq; demū loco tua industria repositus, cor ueluti ereptum tibi uehementissima secū ui rapiat, certe fieri necessum fuerit, ut quod in homine maxime alienum a terra & cœleste esse debuerat, id alienum a cœlo & terrestre euadat, rotumq; hominē noxia uetustate corrumpat. Hęc autem omnia summi Ecclesię proceres & sapientissimi præsides a uobis potissimū nos omnē bene uiuēdi disciplinā mutuati

E

uestrisq; exemplis instituti prestare, & quo nihil iustius uehementiusq; a nobis exigitur, humane tum fragilitatis tum dignitatis ratione habere debemus. Vestra uero uirtutis erit non uestra modo sed nostra etiam capita ungere, hoc est inscias mentes Euangelicæ eruditionis, imbecilles animos perfecti roboris, saucia corda uiui medicaminis spiritali unguento perfundere. Vestram deniq; faciem in qua omnes coniectos fixosq; oculos habent, ita ab omni turpitudinis nota abstergere, ut sicut in ea diuinæ authoritatis splendor emicat, sic & in uita quid homine maius atq; diuinum nobis reluceat. Tu uero. B. P. cui latissima Ecclesiæ facies per orbem longe lateq; diffusa, ad imperium nutumq; patet, quam Christus ex infirmis quidem hominibus, sed diis ualidissimis aggregauit, cuiusq; unctum inuisibili spiritus oleo caput te constituit, eam quantum tibi per temporum hominumq; iniuriam licet, candidam, serenam, atq; tranquillam, seruare non desinis. Et quemadmodum Moses mirabili uultus claritate in hebreorum populum irradiauit, ita nimirum tu qui non in Mose sed Christi uices locumq; suspectus es, eam immenso sapientiæ maiestatisq; tuæ fulgore iugiter illuminare & fulgore accendere non cessas. Faxit igitur deus Opt. Max. ut incomparabile istud tuum lumen depulsis impietatum & superstitionum tenebris, in plurimos annos quos felicissimos tibi comprecamur, nobis affulgeat.

EIVSDEM DE ECCLESIASTICA

Vnionē & Communionē, oratio Coram ipso

Paulo. I I I. Pont. Max. & Reuerendissi

morum Cardinalium cōfessu, Domi

nica. 4. quadragesimæ an

ni. 1537. habita.

Vi in optatā Ecclesiasticæ unionis cōmunio
nisq; fœlicitatē, qualescunq; hodie dicēdi vires
conferre statuerim. B. P. qui mirari dēbeat ne
minem esse existimo. Nam dum præsentīū ma
la temporum quæ oculos fugere nequeunt la
chrimis nos Babilonis flumina miscere cōpellunt, antiquæ
unionis cōmunionisq; tuæ, O Syon meminisse cogimur.
Verum ne celebrem huius diei læticiam luctuosa oratione
perturbem, quæ dicenda suscepī, ita temperare conabor, ut
ipsam calamitatum acerbitatem ex tua. P. B. prouidentia
vestrisq; P. Amp. studiis pristinæ quietis tranquillitatisq; ex
pectatione lenire possimus. Cæterū & ab Euangelio quod
seruatorē copiosam multitudinē diuinitus refecisse cōme
morat, hoc institutum non admodum abhorrere cōspicio.
Si enim Paulus mirabile diuini spiritus organum omnes
unius panis poculiq; participes, unum ceu panē corpusq;
esse affirmat, ego ex hodierna mēsa Ecclesiasticā unionem
cōmunionemq; non abs re colligere existimabor. De qua
paucis acturus qđ uos a me studiū i dicēdo postulare credo,
id a uobis diligētīæ in attēdendo me sperare posse cōfido.

SI quid est in uita mortalium quod seruandis augendisq;
rebus nostris necessariū esse arbitremur P. Amp. id per

E ii

petuum & indissolubile unionis uinculum esse existimo. Si
qdē ex unionē caritatē ex caritate cōmunionē atq; cōcor
diā ex cōcordia pacē trāquillitatēq; sine quibus res nostrę
constare non possunt, nasci & scaturire nouimus. Nam &
clarissimas urbes, potentissimas Resp. latissima imperia,
quę discordia funditus euersa fuissent, concordia & pace
non modo seruata, sed & aucta fuisse non ignoratis. Quod
si in rebus humanis, id quoq; in diuinis & ad fidem atq; reli
gionem pertinentibus, uerum esse fateri oportet. Quam
obrem Christus tum morti proximus, tum rediuiuus, firma
ta Rep. sua claritatem suis & pacem summopere commen
dasse, & totius charitatis pacisq; authorē ac unionis cōmu
nionisq; fontem spiritum inhalasse legitur. Paulus deniq;
haud nescius q̄ pestifera sunt scismatū & diuersorū dogma
tum monstra, & noxia opinionum inuenta, ad hoc ubiq;
studium confert ut extirpatis eorū radicibus quę iam mul
torum animos occupare, & succrescentē Ecclesiasticę unio
nis cōmunionisq; frugem suffocare cœperant, eandē omni
bus mentē sententiamq; instillet. Huc accedit q̄ Ecclesia
stica hęc hierarchia cœlestem illā in qua Beatos spiritus per
fectissimo animorum uinculo nexos, & incomparabilium
bonorum cōmunionē locupletatos credimus, immo diui
nissimam trinitatem in qua tres in unū numen cocunt, &
tum naturā tum operationē cōmunem habēt, nulla re alia
rectius q̄ unionē cōmunionēq; imitari potest. Hęc psalter
ille diuinus in domo dei quā multi in unū fratres inhabitāt,
nihil iucundius aut foelicius asseruit eaq; fieri cecinit, ut in
uisibilem spiritus unctionem doctrinę, fidei, iusticięq; mi
nistram/a/capite in barbā Aaron hoc est a Christo in Eccle
siasticos proceres a sublimi eius sapiētia & fortitudine pen

dentes, inq; oram uestimēti eius, id est infimos credentium in unica ecclesia ceu incōsutili ueste (ut ita dixerō) cōtextos defluere sentiamus. Qua de re qui inanem disceptationis labyrinthum extruunt, unicam esse Ecclesiam & diuisionis expertem & multitudinis capacē fateantur oportet. Nam iuxta innumera scripturarū testimonia tametsi plures essetum personarum, gentium, locorūq; distinctio, tum diuersa peregrinationis patriæq; ratio confirmet unicam tamē esse perfectā omnium membrorum in capite unio, eadem fidei & religionis professio, spiritus quoq; sacramentorum & dogmatum communio demonstrat. Hæc autem quo studio qua ue industria aut plantata crescere, aut lesa reuiuiscere queat, ex Euangelio audiamus.

Quid uobis quos Ecclesiasticæ unionis cōmunionisq; bases & firmamenta, ad eam uel retinendam uel instaurandam, agere conueniat, hodierno seruatore Euangelio indicasse uidetis P. Amp. Qui firmaturus eam, dum haud dubie extra cœtera atq; seipsum abiisse describitur, pro ea uobis tum opes, imperia, sacerdotia, resq; omnes præclaras tum proprii sensus blandimenta & humanæ rationis argumenta, quæ animos a uero abducere solent, calcanda docuit, eumq; se uobis non quiete sed labore, non refrigerio sed fastidio, non uoluptate sed calamitate, in Euangelicæ prædicationis itinere exhibuit, qui iuxta Mosi uaticinium de monte, id est sublimi cœlestis philosophiæ fastigio igneam in manu legem attulisse legitur, suo nimirū uos exemplo instituens, ut seuiente discordia, frigescēte religione, Euangelicæ pacis & igneæ legis fideli seduloq; ministerio uos accingere, eoq; aduersus impios fratres cum Iosue uos armare non formidetis. Quippe a quo aut non

prestito aut insincere infideq; detorto, pestilentia dogmatum & noxiarum opinionum fontes, emanasse, & foris impietatem, intus superstitionem ac preposterum tandem religionum legumq; ordinem, inualuisse nouimus. At quia in turbulento sectarum seditionumq; diluuiio, quo totius arca salutis impetitur, rem in discrimen adductam uidemus, Seruator lacum Galyleæ id est transmigrationis uos secum transire, hoc est, omnibus aduersitatum procellis superiores euadere præcipit, cæterisq; neq; cæcos neq; igna uos duces præficit, quo institutione & authoritate / a tenebris ad lucem, ab errore ad ueritatem, a morte ad uitam, a tabernaculis choræ & Abyron ad unam eandemq; cõmunem seruandorum arcam facti transmigrant. Nam quod illi pestifera ambitione accensi, Moſen & Aaron, dominatum eis impropere, iurgiis conuitiisq; laceſſere, sibiq; cœterum sanctorũ temere uendicare non erubuerint, id tunc adumbratum, nunc autem in Ecclesiasticæ unionis cõmunionisq; perniciem excitatum cernimus. Verum hic immutabili diuinę electionis consilio animos stabilire, & instar Helyæ qui solum se relictũ conquestus, septem, hoc est, multa uirorum milia qui Baal non adorauissent, superesse intellexit, nos etiam ingentem multitudinem ut Euangelio exprimitur, Christi Apostolorumq; uestigiis id est Christianæ religionis & Apostolicę Ecclesiasticęq; disciplinæ institutis inherere nouisse debemus. Deinde seruator non modo sequentes sincera charitate complexus, sed etiam infirmis pia lenitate compassus, sui uos imitatione non solum qui in sana fide diuino munere perſisterint, incolumes seruare, uerum etiam qui humana egritudine laborauerint, aut aliena iniquitate precipitati uulneratiq; fuerint, erigere,

& curare, atq; in Ecclesiastica unione cōmunioneq; rursus confirmare uoluit. Hæc uero ne subingressis in gregem lupis, uiolari ac dissipari queat, uos secum a ualle in montem conscendere, hoc est a torpore ignauia, & ocio, quæ Ecclesiasticam dignitatem dedecorant, in assiduarum sollicitudinum, excubiarum, & actionum altitudinem, unde uigiles studiosos diligenteq; Episcopos id est inspectores agere de beatissimis, consurgere iubet. Quibus sane omnibus fiet, ut uestra fide studio & opera compositis Ecclesiæ rebus, populus cum Christo iuxta Iohannem in uiridi gramine, hoc est iuxta Elayam in speciosa & amabili pacis pulchritudine seadeat, mactatis Egyptiorum primogenitis id est concisis impiorum dogmatum, & exitialiū dissidiorum capitibus, pascha Iudeorum, in credentium confitentiumq; profectum celebret, uni deniq; & communi mysticæ in Ecclesia mensæ foeliciter accumbat. De qua proximam Euangelii partem q̄ paucissimis absoluere conabor.

Spiritalem mysticæ unius in Ecclesia mensæ communio nem uestre creditam fidei & dispensationi, Christi uobis exemplo cōmendatam animaduertitis P. Amplis. dum copiosæ multitudinis curam uerus ille pastor & Episcopus suscepisse, & quibus epulis cœleste in terris cōuiuium ei instrueret, suos tēasse legitur. At neq; Philippi neq; Andreæ sententiam approbat, quorum ille ducentorum denariorū panes, hoc est doctrinā iusticiamq; humanā, ingenti studio atq; labore quæsitam, hic quinque ordeaceos panes duosq; pisces a puero pductos, hoc est traditionē sanctimoniāq; legis, Mosi creditam ministerio, uix utcunq; tamē ad uite pietatis foelicitatisq; plenitudinē sufficere posse existima-

uere. Dumq; miram incōparabilemq; diuinitus mensam
instruit, qua gregē alimonia pascere debeat, uerborum fa-
ctorumq; suorū imagine exprimit. Neq; enim quemlibet
cibum sed suis dumtaxat manibus sacratū hoc est doctrinā
iusticiamq; ex humana diuinā, ex Mosaica Christianā red-
ditam, & iam nō naturæ sed gratiæ, non operū sed fidei, nō
legis sed promissionis, in esurientē & inedia confectā mul-
titudinē, Apostolico uestroq; ministerio dispensari præci-
pīt. Idq; eo sepius ac diligentius, quo magis ex auctorū ho-
die panū, & indeficientis olim farine & olei argumēto, cœ-
lestem cibum dispensatione nunq̃ minui semper autē cre-
scere indicauit. Qui cū omni esurie fortior, omniq; captu
capacior, sumi quidē sed non consumi, fide cōmunicari nō
abdicari possit, fragmenta quæ superesse necesse est, ne ne-
glecta minimeq; dispensata aut sumpta pereant, ad uocan-
dorum in dies filiorum, robur atq; salutem colligere iubet.
Quibus ut olim Helyas angelico, turba hodie Apostolico,
utroq; certe uestro ministerio, ubiq; autē Christi beneficio
satiati, opulentā spiritalis mensę cōmunionem diuinissimā
illius prophetæ acuius aduentu salus omnis expectabatur,
liberalitati & munificentię acceptā referant. Summatim
nonnulla quæ ad Ecclesiasticę unionis cōmunionisq; fœli-
citatē attinere putaui ex Euangelio protuli. P. Amp. pro
qua una cū Hieremia Euangelicę ueritatis hostibus murū
æneum uos positos meminisse debetis. Fidei namq; solidi-
tate qua cruciatus mortemq; despiciere, constantia qua in-
fracto inuictoque animo persistere, sonora spiritus doctrina
quam mentibus infigere non dubitetis, uos præstare decet,
atq; summa ope niti oportet, ut dum aliena mala quibus
Ecclesiasticam unionem communionemq; labefactatam
uidemus,

videmus, eradicare cōtenditis, etiam domestica errata quibus Ecclesiasticę dignitatis existimatiōe lesam non ignoratis, extirpare conemini. Quo fiet ut alios uestra doctrina ad recte sentiendū, uestroq; exemplo ad bene recteq; uiuendum institutos, spiritualis unius conuiuii in quo iam non caro & sanguis, uerum quid dico? Immo caro & sanguis sed Christi, spiritus deniq; & uita proponuntur, participes efficere possitis. Quę omnia cum tu B. P. diuina tum prouidentia tū autoritate dirigere debeas & Ecclesiasticę unius arę gubernacula teneas, te potissimū in Galyleo diuisionum sectarumq; mare interpello. Tu enim eximium illum Noe qui pacificus quietusq; dicitur referens, cū totius concordie pacisq; principem & unionis cōmunionisq; auctorē semper te pręstiteris, tuo nos pręsidio fore expectamus, ut columba spiritus a te tuisq; Apostolis egressa siccatis undis, ramum frondentis oliuę uictorię pacisq; signum afferens, diuinę protectionis montem designet, in quo instar Christi inter purpureas spiritualis leticię rosas, densasq; uirtutum frondes cum electis Ecclesię filiis cubes, eis ab intolerabili seuientium malorum æstu, quietem refrigeriumq; pręstes, cœlestem deniq; alimoniam impertias. Quod tua uita durante, quam diuturnam foelicemq; esse cupimus, nobis non defuturum credimus.

EIVSDEM DE SACERDOTII DIGNI
tate oratio Coram ipso Paulo .III. Pont. Max.
& Reuerendissimorum Cardinalium
confessu, Dominica.4.aduentus
tus anni.1537.habita.

S I quid pietati, & religioni, qua homines mortales in deorū immortalium cōsortium rapiuntur, proximū esse credimus. B.P. id potissimum sacerdotii munus esse existimo. De cuius dignitate atq; officiis, cū innumeras alias & copiosissimas dicendi rationes amplecti potuissem, non abstractare constitui, primū q̄ corā summo sacerdotū principe & supremo eorū procerū senatu qui religionē sacerdotium & sacra tueri debent, quibus nominibus rebusq; nihil maius diuinusq; esse arbitror, sum uerba facturus. Deinde q̄ sacerdotii cū incredibilem magnitudinē tum incōparabilem administrationē in aperta Apostolicę Euāgelicę doctrinę luce propositā hodie uidemus. Paulus enim impiis sacerdotes atq; Episcopos ministros Christi & dispensatores mysteriorū dei constituit, Lucas uero dum sub alienarū gentium tetrarchis atq; p̄sidentibus, Iohannē leuitico genere ortum, nouiq; sacerdotii destinatū p̄conē introducit, ueteri plane sacerdotio finē imponit. Quę dum succincte tenuiterq; perlustro, uos quęso P. Amp. attentas aures animosq; faciles Paulisper accommodate.

A D illustrandā sacerdotii maiestatem, & officiorū eius explicandā magnitudinē, nihil magis cōducere puto, q̄ totius author salutis, & eā seipso, & seipsum ea clarū illu-

stremq; haberi uoluerit, & cū ea ipsa simul ac regia dignitate fulgeret, hanc illius uirtute sibi præcipue uendicauerit. Non enim qui religionē solū præfesset, sed etiam qui præuia religione additisq; sacris regnū obtineret, sacerdos uenisse creditur. Nam & mundi principes sub quacunq; demū religione uiuere, a sacris semper auspicati sunt omnia, & absq; sacerdotū officiis nihil recte fieri posse existimauere. Quā obrem a sacerdotio etsi non obscuro illo & parū insigni leuitico, a claro tamen & excellenti a quo sacerdotiū omne in Ecclesiam defluxisse credimus, & gestorū Christi auspiciā præmitti & re ipsa perfici oportuit. Nam ut cœtera præteream, duo esse in Christiana religione sacerdotiorū genera, alterū citra hierarchyci ordinis iniuriam omnibus cōmune, alterū iuxta Ecclesiasticæ uocationis mensuram quibusdā peculiare, ex sacris literis aperte colligimus. Quare ut ex diuinarū scripturarum thesauro uetera & noua depromā, nonne deū Opt. Max. quotquot eius legibus bene Beateq; uiuendo parerent, promissisq; fiderent, eos sacerdotes delegisse Moses affirmat? Petrus deniq; senatus Apostolici caput, cunctos religionis Christianæ mysteriis initiatos fideq; imbutos non modo sacerdotū sed etiā sacerdotii ipsius sacrosancto nomine dignatur. Quid si credentes, omnes etiam Christos dici in scripturis fateri oporteat? nimirū quia sacerdos omniū Christus ut immortalī deo spiritales litare uictimas, seseq; ad capitis usq; iacturam cōsecrare non dubitent, omnes, id genus sacerdotes oleo inuisibili unxisse dignoscitur. Qua moderatione si incidentes de sacerdotio disceptationes temperarentur, non tot homines, aut propria cœcitate, aut aliena iniquitate seductos, in errorum uoragines prolabi uideremus. Neq; enim omnes

sacerdotes id est præfides esse asserere debemus. Si quidē sic filios Davidis utiq; pphanos, & a sacrorū officiis alienos, Iethro madianitam & in Esaya maiores sacerdotes dictos legimus. Nec deniq; omnes Ecclesiis ad sacrorū ministeria præfectos esse, aut eiusmodi functionis potestatem habere, ulli, nisi in Ecclesiasticū ordinē iniurii affirmauerint. Quos q̄q̄ innumeris scripturarum testimoniis confodereliceret, apertissima tamen doctoris gentiū sententia satis conuulsos fractosq; arbitror. Is enim, nunquid ait omnes Apostoli? nunquid omnes Prophetæ? nunquid omnes doctores? atq; pastores? Quorū officia cū ad euangelicū spectare sacerdotiū animaduerrere debeant, non sane omnibus cōmune id esse fateantur necesse est. Quibus de rebus cū non nisi iuxta Apostolicæ Euangelicæq; doctrinæ regulā dicere stauerim, illico ad eam me confero. Interim si quæ ad uestri muneris, & uitæ rationē pertinent, attigero, pro uestra humanitate facili uenia donandum me existimabo.

Paulus ille gentium Apostolus, qui in uices Apostolorū locumq; suffecti sacerdotes atq; Episcopos agitis P. Amp. uos ministros esse Christi imprimis affirmat. Quæ sententia sacerdotiū uestri, & Episcopatus tum dignitatem maximā, tum munus grauissimū expressum, perpendere debetis. Quid enim Christi ministerio aut illustrius aut maius aut eminentius esse potest? quo sacerdos a rebus prophænis ad tractandū sanctissimū diuinissimūq; eius negotium segregatur, & diuinitati proximus efficitur? Ad id Paulus qui Apostolicā doctrinā pari autoritate atq; modestia in tonat, & Iohannes ille lucerna ardens & lucens, quæ mirabiles in Euangelio radios & ignes iaculatur, inaudita uoca-

tione inuisq; spectaculo adsumpti, Ille uoce cœlitus delapsa
 non minus uocatus q̄ territus, hic facto super se uerbo Do
 mini subito eius numine transformatus, qua religione ip
 sum sacerdotii ministerium tractare & explere uos deceat
 ostendunt. Quamobrē Paulus dum se fere semper Christi
 seruū & ministrū, nōnuq̄ oratorē & legatū esse gloriatur,
 tanq̄ maiore titulo potestātē sibi asserere aliisq; approba
 re non posset, suo effecit exēplo, ut modestā hoc nomine di
 gnitatis gloriā tū ab alieno contēptu & iniuria liberā, tum
 ab omni tirānide ac insolentia immunē, seruare debeatis.
 Per id autē inprimis autoritatē uobis cōmendat. Iohan
 nes uero dum sacerdotii ministerio & Apostolicæ legatio
 nis munere perlustrata omni Iordanis regione cunctis, qui
 salutaris lauachri mysterio, prioris uitę pœnitudinē testa
 rentur, gratuitam condonationē denunciat, assiduū docen
 di, prædicandiq; officiū a uobis exigit. Quod dum sacerdos
 aut Episcopus explet rem adeo dignā exequitur, ut exēplo
 Pauli electū Christiani nominis organū, instar Iohannis,
 uox clamātis in deserto, & uiuū dei os esse & haberi merea
 tur. Verū inter hæc decora ministerii uestri ratio, cuius ma
 ximā in uoce minima uim puestigandā Apostolica doctri
 na proponit, animis uestris inclamat P. Amp. ut uos gre
 gi non tam præesse q̄ ministrare debere, eūq; magis fidei ue
 stre creditū, q̄ potestati traditū, plus deniq; uobis oneris im
 positum q̄ dignitatis aut honoris collatū esse memineritis,
 dumq; Apostolorū successores & Christi ministros uos esse
 animaduertitis, ad hoc sedulo incumbatis, ut maiorū ima
 gines proprię ornāmētis gloriæ, genus Apostolicū uirtutis
 opinione, dignitatē ac titulū sacerdotii munere testificemi
 ni. Hoc subinde Paulus in dispensatione mysteriorum de

officio planè sanctissimo, diuinissimoq; potissimum cōstituit. Non enim foris dumtaxat cœlestiū mysteriorū elementa proponere, neq; instar leuitici sacerdotis corporale flāma educere, sed insonantē animis spiritū, & diuinū ignē uerbi ministerio & precationis studio aduocare debetis. Alioqui si tam necessariā dispensationē a qua uestre dignitatis & ministerii rationē, ac tot hominū salutē pēdere nō ignoratis, impie præterieritis diuinæ indignationis iram, quod Paulus etiam intentasse legitur, in uos prouocare nō dubitabitis. Is nimirū impiam quorundā ignauiam dānat, dū alter regionē omnē ab Hierosolyma ad illiricum, & scelesti usq; Neronis regiā, & orbē fere uniuersum, mysteriorū Dei dispensatione penetrat. Alter dum ad gētes Iordani proximās & impii Herodis aulam, ac carcerē deniq; ipsum cœlestium sacramentorū administratione pertrāsiit, Dumq; sanctissimas omnibus leges præscribit, seruatorē olim promissum, & expectatū adesse, iudicēq; adfore denunciat, peruios ei animos, & rectas cogitationū semitas, mentium ualles de pressis Pharisæicæ superbiæ mētibus Euāgelicæ gratiæ præparatas, rectā dānata superstitionis prauitate religionē & uerā cōposita asperitate lenitatē, ab omnibus expostulat uos quales dispensatores mysteriorū dei præstare debeatis, instituit. Qua de re quod superest inquit Apostolus illud in dispensatoribus exquiritur, ut fidelis quis inueniatur, ut sci licet is unica phœnix inter sacerdotis & Episcopos merito habeatur. Verumtamen si incredita uobis dispensatione Christi non uestrū negotiū agere, ac prope etiam uitę anteponere, Euāgelicæ doctrinæ mysteria sincere citraq; secum tractare, turpia lucra exhorrere, quę dispensanda suscipistis elargiri, omnia ad gregis salutē nō ad propriū cōpen-

dium referre, Ecclesiis institutione uigiliis defensione fortu-
 nis sanguine adesse, contempta libertate cū offensis arde-
 re, cū infirmis infirmi fieri, omniū affectus necessitudinesq;
 in uos transformare, Vulnus infligere & mederi, seuire &
 blandiri, modis deniq; omnibus Christi gloriæ & Euange-
 lio accessionē facere noueritis, tum demū fidi prudentesq;
 dispensatores haberi poteritis. Qua fide atq; prudentia an-
 polleatis, nec alienū nec uestrū uobis iudiciū sufficere Pau-
 lus ostendit, dū dispensationis suæ fidē suāq; iusticiam neq;
 corinthiorū neq; ullo hominū iudicio, neq; officiorum cō-
 scientia metiri, nec inde alicuius famæ diurna (ut ita dixe-
 rim) claritate uult illustrari, asserens omnia a diuino pende-
 re iudicio, quo optimus quisq; aut sacerdos aut Episcopus
 clarā dispensationis suæ laudē & copiosam mercedē a Deo
 referet, nimirū quando ut Euangeliū concludit omnis ho-
 mo carne mortalis tandē immortalitate donatus, quo salu-
 tem assequuti sumus eū defecata mētis acie intuebimur.
 Quo circa Paulus atq; Iohannes aspernandā esse sacerdo-
 tibus & Episcopis humanæ opinionis gloriā & magni no-
 minis splendore docuere, dū alter cū primas ei darent coriu-
 thii eūq; ceteris Apostolis pręferrent, alter cū pro Christo
 haberetur magno uterq; animo contēpsit. Quas modo ex
 Apostolica Euāgelicaq; doctrina institutiōes audistis P.A.
 eas ad sacerdotii uel ordinē quo donati estis uel saltem mu-
 nus quod uobis incumbit morum integritate & bonarum
 actionum assiduitate illustrandū pertinere animaduertitis.
 Quamobrē cū pręcipua eiusmodi administratiōis pars in
 ligandi soluendiq; hoc est docendi & iudicandi potestate &
 officio cōsistat, quod eo dignius est ac maius quo enim cen-
 sentur pręstare corporibus, summopere prouidendū est ut

uerbo dei quod dispensandū suscepistis uestrā potestātē me-
tiamini, Alioqui futurū expectātes, ut quæ siue in publicis
iudiciis siue priuatis sententiis temere ac frustra tentaueri-
tis, diuinū iudicium cui omnis sacerdotū autoritas parere
debet, infringat. Non enim alia ratione in rebus præsertim
fidei legū religiōis cœterisq; id genus sepe & maturius pon-
derandis uestrā Christus sententiam probatū iri promisit.
Cœterū iusta iam ex dictis occasione habita ad te cōuertor
B. P. istāq; tuā supremi sacerdotii sūmiq; pōtificatus digni-
tatē suspicere cogor. Tu nāq; Christū in terris referens, ip-
sius quod spiras uerbo omniū tū sacerdotū & pōtificū tum
legum ac principū leges atq; iudicia exanimas. Nā ut supre-
mus ille parens in cœlo iudicium filio, ita nimirū ipse dei fi-
lius id tibi omne super terrā iuxta creditū tibi mandatū, cō-
mune fecisse creditur. Et si Paulus ille tuus se spiritū Christi
habere nō minus pie q̄ uere gloriabatur, eūdem quoq; tibi
Ecclesiastici ordinis principi non deesse debere existima-
mus. Quo fit ut cum nuper pro tua diuina dignitate & ne-
cessaria tuorū salute, totius Ecclesiæ synodū tot iam annis
desideratam decreueris, qua re ueluti flatu læticiæ Christia-
num orbem recreasti, foelicissimi nobis esse uidemur, quib-
us incomparabilis animi tui magnitudo atq; foelicitas
breui fore pollicetur, ut compositis principum animis re-
bus deliberandis maximam dexteritatem adferat. Quod
ut fiat deus Opt. Max. te cadenti Reip. Christianæ laben-
tiq; religiōi, cui uere sacerdos ac Pontifex Maximus es
præfectus, defensorem propugnatoremq; in multos ac fo-
elices annos seruare non desinat.

Eiusdem

25

EIVSDEM DE DIVINÆ VOCIS VIR-
tute oratio Coram ipso Paulo. III. Pont. Max.
& Reuerendissimorum Cardinalium con-
fessu, Dominica .4. aduentus
anni. 1538. habita.

QUod mirificus ille Baptista delegatæ sibi pro-
uinciæ authoritatē conciliaturus sola uoce cla-
mantis in deserto gloriatus fuerit B. P. incom-
parabilem profecto diuinæ uocis magnitudi-
nem & uim expresse creditur. Quid enim im-
mortalem deum, quem omnium spiritum parentem, & to-
tius uitæ fontem esse nouimus, nisi spiritum semper lo-
quentem & uitam omnino uocalem existimare debemus?
Quod igitur mortalibus uerbum mente ceu matre conci-
pere, spiritu uocem edere, uoce deniq; sermonem enun-
ciare diuinitus cōcessum fatemur, id immortalī deo sed dif-
ferentibus plane modis adesse nō dubitamus. Mens enim
nostra tametsi corporibus intra suæ angustias naturæ sem-
per clausis supereminens, congenita sibi uiuacitate omnia
collustret, internum tamen sermonem, quem spiritu corpo-
ris insensibilem uocem proferat, aliunde cōcipere cogitur.
Diuina uero nullius indigens, cunctaq; continens, sic om-
nia æterna uerbi luce penetrat, uitali spiritu fecundat, im-
mensa uocis uirtute excitat, ut nihil ab aliis suscipiat, om-
nibus autem sua larga liberalitate impertiat. Itaq; huma-
na diuinis, temporaria æternis omnino cedant necesse est,
Illic præter caducam & fluxam imbecillitatem, hic præter
stabilem immobilemque potentiam nihil intueri licet. Diui-
næ etenim uocis nulli cedente, cunctaq; uincente uirtute,

G

originem habere omnia , orta suis seruari naturis , seruata
in contrariū nonnunq̃ uersa perpendimus. Sic opertam di
luuio terram , regressum solem , redacta in cruorem flumi
na , sectum populis æquor , redditam e saxo sterili aquam , re
stituta uitæ cadauera , & id genus innumera ad diuinæ uo
cis imperium facta legimus. Quæ si uidentur exigua ad res
animorum , pietatem dico & religionem feramur , in qui
bus insuperabilis inestimabilisq; uocis diuinæ uirtus , immi
nentibus periculis , negante uetustate , renitente consuetu
dine , repugnante natura , & omnia in contrarium arman
te humani generis hoste , ueterem mūdum innouauit , & ho
mines a patriis ritibus , ac maiorum institutis , in multo di
uersam religionem & aliud uitę genus adductos , in deos
transformauit. Quę uero pertinaciter obstiterant , ea om
nia ueluti tenuem puluerem qui spirantium uentorum im
petum nō sustinet , in nihilum redegit. Quæ obsecro re quid
clarius illustrius ue haberi potest . Nam ut e plurimis pau
cissima & maximis minima producam , ex nihilo prodisse
omnia , immortales esse animos , rediuiuos fore mortuos , &
quæ nullis oratorum uiribus aut philosophorum rationi
bus persuaderi potuere , eorum fidem sola Euangelicæ præ
dicationis uox per ineruditos ignobilesq; delata inducere
ualuit. Quid præterea de immensa diuinæ uocis magnitu
dine referam , quæ per decertatē adhuc peregrinantemq;
in terris Ecclesiam multiformem dei sapiētiam cœlestibus
olim spiritibus absconditam patefecit ? Quæ demum tot
deorum aras , sapientum rationes , regum conatus , heretico
rum artes , & omnem altitudinem aduersus scientiam dei se
se erigentem , ac proinde cœlum terram atq; inferos uicit ,
& suo imperio subiugauit. Hanc Paulus ille strenuus inui

et usq; milicie Christianæ Imperator, subacta Græcia, magnaq; minoris Asiæ parte, in Romanum tandem Imperium nullis tum regum uiribus, aut hostium copiis expugnabile, uictricem intulit. Qua de re quæ pauca admodum dicenda suscepi, hodierno ea Euangelio accommodare constitui.

Quo tempore Tiberius Romanum tenebat Imperium & Annas atq; Cayphas principatu sacerdotum, & sacrarum rerum summa potiebantur, e ferarum latibulis in medium prodiit eximius ille uates, & omni seculo admirandus Iohannes, facto super se uerbo domini diuinę uocis organum delectus, ipsamq; diuinam uocem uox ipse clamantis in solitudine uox nimirum uocem, clamans clamantem solus solum quicq; solus est & in diuinitatis penetralibus latitat, auribus omnium animisq; mirabiliter insonantem, sedulo sui muneris officio, inualida aduersus diuinum decretum mundanę dignitatis fastigia, ac inania hominum molimina & consilia uincere fecit. Prodiit inq; preclarissimus ille uocis diuinę preco, ad perficiendum suę legationis negocium instar Hieremię prius sanctimonia q̄ luce donatus, exemplo Mosi deus hominibus cōcessus, more Helyæ diuino numine & robore præditus, socius angelorum, & inter feras obambulans, altior cœlo, & in solitudine uitam agens, Christum indutus, & pilis uestitus, cœlestibus epulis faciat, & locustis ac melle refectus, mentem Christi tenens, & uocem dumtaxat se asserens, eoq; uiuendi genere in Ecclesiarum præsidibus, quos diuinę uocis organa esse decet, omnem fastum luxumq; damnare & euertere. Ac interim delegatum sibi munus mirum in modum

commendare studuit. Id quod adeo eximia tum prudentia
tum opera expleuit, ut terribilibus amabilibusq; in Euan-
gelicæ uocis præconio coniunctis, nullis hominum aut mo-
ribus aut ingeniis ulla in re defuerit. Quid enim (ut horri-
bilibus in monte signis adumbratum fuit) uoce legis im-
portabilius, qua ueluti cōinationum fulgure omnes tum
scribas ac Phariseos, tum publicanos ac milites exterruit,
iudicii terroribus exanimauit, & nisi resipiscerent ad eter-
næ mortis supplicium damnare non dubitauit? Quid ue-
ro id quod olim Helyæ sub typis quibusdam demonstra-
tum exitit, Euangelicæ promissionis aura gratius, qua cun-
ctis saluari lauacro ceu quodam iusticiæ simbolo seruato-
ri Christo initiatis, quos prioris uitæ pœniteret, gratuitam
condonationem attulit. Hoc inquit eterni principis man-
datum agnoscite quod orator ego & præco, neque ignauia
prætereo neq; impia temeritate excedo. Sed quod fidelem
cœlestium inysteriorum dispensatorem decet, sincere ut ac-
cepī administro. Hanc audite eius non meam aut alienam
uocem (eius rei testem Esayam facio) quam non e phyloso-
phorum dōgmatibus, non scribarum aut phariseorum ca-
thedris, non mendacibus hereticorum inuentis, sed ex ipso
eius ore spiritu & corde profero. Parate uiam Domini re-
ctas facite semitas eius. Omnis uallis implebitur, & omnis
mons & collis humiliabitur, & erūt praua indirecta & aspe-
ra in uias planas, & uidebit omnis caro salutare dei. Itaq;
cum adeo multa in orbe Christiano cæco sui amore & ina-
ni fiducia imparata, noxiis cupiditatibus obliqua, omni
uecordiæ & scelerum genere in ualles prostrata, uana sapien-
tiæ sanctimoniæq; persuasione in montes elata, in uersa re-
ligione ac impietate deprauata, intractabilibus hominum

moribus aspera uideamus, quid mundum restituet nisi diuina uox intimis animorum recessibus insonans, quæ semel conditum & mortifera tandem uetustate consumptum in nouauit? Huius diuinæ uocis incomparabili uirtute, & uestra P. Anip. prudentia diligentiaq; certo fore expectamus ut Deus Opt. Max. mentium cecitatem uera in eum fiducia depellat, sinistros appetitus diuinarum rerum amore commutet, deiectos animos ad spiritualis iusticiæ, & cœlestis regni sublimitatem erigat, Sublimes sibiq; placentes crucis humilitati subiiciat, deprauatam religionem ad Euangelicæ ueritatis regulam exequet, morum asperitatem Christiana benignitate charitateq; leniat. Quo fiet ut destinatum nobis ante originem mundi & diuinitus nominatum totius authorem salutis in cōspicua diuinitatis specie coram intueri possimus. Vos etenim Ecclesiæ procures incondita nostra componere, obliqua dirigere, uallium deiecta restituere, montium supercilia humiliare, praua exequiare, aspera leuigare, Immortalem deniq; deum uestra tum uoce audiendum, tum luce uidendum, monstrare debetis. Alioqui si in delectis Ecclesiæ præsidibus imparata omnia, quæ parandorum nobis animorum imago: si obliqua quæ rectitudinis regula: si desperata, quæ subleuandi forma: si supercilium quæ modestiæ facies: si praua religio, quæ pietatis norma: si morum asperitas quæ lenitatis effigies: Postremo si taciturnitas & caligo, quæ audiendi uidendiq; deum species esse posset? In te autem .B. P. maximam amplissimamq; eiusmodi rerum facile instaurandarum spem reposuimus, inq; eam præclarissimis & heroicis plane facinoribus tuis adducti sumus. Tu namq; Iohannem & Helyam spiritu & fortitudine referens, potentissimos Christiani

orbis principes uiuę uocis energia ceu numine quodam oc-
culto conciliaſti, & poſitis ob oculos noſtris calamitatibus
ad miſericordiam, uiolatis ſacris ad pietatem, diuinis huma-
niſq; uiribus ad concordiam flexiſti. Voce igitur tua quę
non niſi incomparabilem animi magnitudinem & ſapien-
tiam ſpirat cœlum terram ac tartara pulſaſti, dum adlata
quę in deſperationem uenerat pace, cœleſtes ſpiritus no-
ſtris malis offenſos exhilaraſti, Chriſtianum orbem ſanguine
madentem reſtituiſti, inferos maximis inſanდიſſimiſq;
ſceleribus oblectatos confudiſti. Quibus ex rebus id præ-
terea tuę ſcœlicitati ſeruatum eſſe merito credimus, ut te ad
reſtituendam in interitu, retinendam in periculo, augen-
dam in proſperitate, Reip. Chriſtianę ſalutem, in pluri-
mos annos ſcœliciter imperante, Chriſtianiſſimos Principes
qui mutuis præliis interire cœperant, ſcœdere iam fir-
mato potentiſſima uoce tua excitatos, in immaniſſimum
Chriſtiani nominis hoſtem, fines noſtros terra mariq; inſe-
ſtanti occupantiq; & magnam quotidie Imperii no-
ſtri partem tyrannidi ſuę ſubiicientem, uictoria ſigna fere-
re, & clara inde trophea referre uideamus.

EIVSDEM DE DIVINI SAPIENTIA

Spiritus oratio Coram ipso Paulo. III. Pont.

Max. & Reuerendissimorum Cardi

nalium confessu, Dominica

.4. quadragesimę an

ni. 1539. habita.

Væ ad perfectam diuinæ naturæ similitudi-
 nem, quam in illa uere fœlice Beataq; uita ex-
 pectamus, & ad quam totis (ut aiunt) uiribus
 neruisq; contendere debemus, nos euehere & su-
 blimare possunt. B. P. inter ea diuini sapien-
 tiam spiritus potissimum eminere existimo. Si enim diui-
 nitate innouamur, in expressam immortalis Dei speciem
 immo in deum ipsum transformamur. Si spiritu instaura-
 mur, ab omni terrestrium corporaliumq; rerum crassicie &
 fece purgati, diuinam quandam puritatem mundicięq;
 adsequimur. Si sapientia illustramur, ad altissimarum re-
 rum cognitionem & incomparabilium bonorum amo-
 rem gustumq; rapimur. Hæc nimirum illa est non quam hu-
 manæ mentis industria & studio adquiri philosophorum
 pleriq; sensere, sed quam sapiens ille diuino adflatus numi-
 ne, ab omnium opifice deo edoctum se affirmauit. Eam
 namq; incorruptibilem esse uirtutis dei uaporem, since-
 ram claritudinis eius emanationem, igneum lucis eternæ
 candorem mundum diuinę maiestatis speculum, & expres-
 sam bonitatis imaginem rectissime definiuit. Quæ si qui-
 spiam fortassis de ipso dei, filio quem eternam patris sa-
 pientiam esse credimus, intelligenda obiecerit, id ego facie
 le concedere nō dubitauerim, modo tamen diuinitus eam

dari caq; sola nos uere sapientes fieri posse persuasero. Id quod non obscura ipsius sapientis sententia manifestum esse arbitror, qui illam unam eandemq; in se permanētem in humanos se animos transferre, cuncta innouare, & amicos prophetaſq; dei ac proinde uere sapientes constituere testatur. Qua præterea ex re nihil usq; adeo esse reconditū, quod non peruestigare, obscurum, quod non illuminare, in malo firmatum, quod non soluere, uetustum, quod non natia quadam nouitate illustrare possit, pro singulari quadam ipsius diuinæ sapientiæ laude merito colligimus. Quæ cum ita se habeant uerissimum esse animaduerto, quod nō modo diuinarum sed humanarum etiam scientiarum testimonia astruxerunt. Neminem scilicet nisi bonum uere sapientem effici posse. Ipsa enim diuini spiritus sapientia sine iis que Dei Opt. Max. amicitiam conciliant, nempe fide qua deum uere cognoscere, religione qua cum pure colere, amore quo nobis eum perfecte conciliare, paupertate spiritus qua nos ipsi fortiter cōtemnere, charitate qua proximum sincere diligere debemus, constare non potest. Quo circa Iob ille constantissimus ipsam sapientiam ueram esse pietatem, uerissime asseruit. Huius adeo claram admirandamq; uirtutem esse nouimus, ut uere sapiens sibi desipiendo sapiat, ac proinde sese damnando iustus fiat, in inum deprimendo libertatem accipiat, miserum reputando beatitudinem reperiāt, Nam aliena nempe diuina nos sapientia sapientes esse, iusticia iustos, libertate liberos, fœlicitate beatos, propria uero sapientia id est falsa ueræ sapientiæ persuasione, quam Iacobus animale, Paulus carnis sapientiam adpellauit, nos desipere, iusticia damnari, libertate seruos, fœlicitate miseros esse Euangelica Apostolicaq; doctrina

doctrina pronunciat. Id quod uere cognoscere, medullitus sentire, ardentem amare, ingens & immensum ipsius diuinæ sapientiæ munus esse credimus. Sed quia iam in mirabilem eius uirtutem cuius radiantia in Euangelio sydera contuemur, incidimus, ad ipsam illico sermonem conuertimus.

I Nestimabilem spiritualis diuinæq; sapientiæ uirtutem, qua uos potissimum præstare decet P. Amp. totius auctor sapientiæ immo sapientia ipsa, dum iuxta Euangelicæ lectionis exordium Galyleum mare pertransiit, manifesta factorum suorum specie adumbrasse creditur. Nam cum ipsa diuini spiritus sapiëntia uiam portumq; salutis ob oculos ponere, & comes ei ipsius prudentia spiritus, uitanda pericula indicare debeat, illius sane atq; huius munere ac uirtute, ut procellosum turbulentumq; præsentis uitæ statum illeis infractisq; animis trāseamus, fieri colligimus. Quamobrem si in immundæ libidinis aut noxiarum cupiditatum duram seruitutem & impiam tyrannidem ceu scopulum incaute incidentes, naufragium facimus, aut quorumuis malorum procellis a uero rectoq; deiecti cedimus, cum omnem sapientem non modo liberum fortemq; sed etiam regem esse deceat, uerum sapientiæ nomen cum re ipsa merito amittimus. Deinde seruator, dum sequentem se imperitam multitudinem non minus inuincibili q̃ inuisibili tractu allicit, sapientiæ uirtutem, sapientisq; munus esse docet, ut cū Paulo christum ipsum imitatus, aliis etiam se imitandum proponat, nihil ori familiarius, auribus gratius, animo deniq; amabilius, ipsius diuinæ sapientiæ eloquiis esse, uita moribusq; testetur. Insipientibus non sibi dumtaxat sapiat, & exemplo Christi qui signa super in-

H

firmis edidisse legitur , eorum' in fide imbecillitatem sua
uirtute adiuuet. Quid igitur de incomparabili eius ener-
gia iuxta Euangelium referam ? quæ cum uiciorum mon-
stris in hoc mare decertat , ueram in Euangelico progressu
libertatem confert, Ingenti animum robore aduersus ma-
lorum procillas confirmat, imitationis Christianę leges &
rationes præscribit, per sapientes & robustos in insipien-
tium & infirmorum animos se transfert, & ut Euangelium
subindicat ueros Christi discipulos post Christum ipsum in
montem hoc est cœlestium diuinarumq; rerum intelligen-
tiam amorem gustumq; prouehit. Nimirum ut olim san-
ctum Loth in montem se recipere iussit , Moſen in monte
præcari docuit, & legem obtinere fecit, Helyam in robore
cibi diuinitus exhibiti in montem impulit, & ut suos quo-
tidie præsertim quibus rerum publicarum administratio in-
cumbit , teste Dauide a montibus æternis mirabiliter illu-
minat . Ibi iuxta Euangelicæ formam hystoriæ sedem sta-
bilit, quietem firmat, fœlicitatem statuit. Qui enim in cœ-
nosa lubricaq; præsentium rerum ualle omnem cogitatio-
nem affectumq; defigit, is animum quem cœlestis diuinęq;
originis esse, & proinde hic neq; stabilem sedem , nec firmā
quietem, nec statutam fœlicitatem habere nouimus, into-
lerabili profecto iniuria afficit. Quo fit ut dum ille diuini
spiritus sapiētia instructus, hic sese peregrinari animaduer-
tit, hebreorum ritu cuius Euangelium meminit, lerum tran-
situm assidue celebret , atq; ab hac tenebrosa calamitosaq;
Egypto , ad terram promissionis id est a seruitute ad liber-
tatem, a labore ad requiem ab exilio ad patriam, cogitatio-
ne & desiderio alacriter emigret. Verum hinc nata de di-
uinæ fructu sapientiæ differendi occasione ad proximam

Euangelii partem me confero.

QUod sapientiam excisis septem columnis hoc est paratis multiformibus spiritualium munerum basibus insignem Ecclesiæ domum extruxisse, & communem in eamensam proposuisse legimus, id in seruatore hodierno expressum Euangelio uidemus. In quo præter immensam diuinæ munificentiae magnitudinem, discipulorum incredulitatem diffidentiamque qua nihil diuini muneris ad salutem percipi potest, notatam esse perspicimus. Nam ut olim usque adeo apud uetus illud hebreorum genus malicia & impietas inualluit, ut deum immortalē tentando dicere non metuerent. Nunquid panem poterit dare aut parare mensam populo suo? Ita nimirum ea fuit Apostolorum adhuc in fide imbecillitas, ut diuinam Christi uirtutem paucitatem panum impediri posse arbitrareretur. Sed cum neque illorum sacrilega infidelitas, neque horum tolerabilis infirmitas, fidem potentiamque dei irritam efficere potuerint, cœleste conuiuium Apostolicę creditum dispensationi, Christus dei sapientia instituit, in quo Ecclesiarum præsidibus Euangelicę administrationis formam legemque præscripsit, dum neque mundanæ philosophiæ manna, quod fastidium generasse legitur, nec panem afflictionis aut formidinis hoc est uerbum diuinarum cōminationum quo territi fugiisse referuntur hebrei, nec laboris dolorisque cibum id est graue onerosamque absque diuino munere legem, cuius pondere & anxii cordis diffidentia premebantur, sed panes propositionis omnium oculis semper conspiciendos, id est uiuum dei uerbum, quo Euangelica promissa exprimuntur, multitudini proposuit. Quod dum peculiari Episcoporum officio cui sedulo iugiterque incumbere debent administratur, credentium animos incredi-

H ii

bili suauitate allicere, mira lenitate exhilarare, ingenti erga
deū immortalē fiducia, magnoq; robore in ipsa diuini spi-
ritus sapientia confirmare nouimus. Nā seruator uerba (in-
quit) quæ loquor uobis spiritus & uita sunt. Spiritū itaq;
& uitā quibus nominibus rebusq; nihil maius aut amabi-
lius esse potest, ex ipsis Christi eloquiis Apostolico ministe-
rio accipientes, adeo toti in ipsum Christum rapimur ac
transformamur, ut spretis mundi prædiis & uoluptati-
bus, contēptis humanarū uirium fiduciis, neglectis philoso-
phorū dogmatibus, cū Apostolorū principe fidenter dice-
re possimus. Ad quē ibimus? uerba uitæ habes. Verba igitur
uitæ ut hic orationē absoluā P. Amp. quibus seruatur
in nobis ac nutritur diuini spiritus sapientia, ab immorta-
li deo Apostolico uestroq; ministerio iure optimo expeti-
mus. Nā ut nonnulla Apostolicæ dignitatis uestre officia
ex Euangelio attingā, uos in nauicula sua naucleros, in mul-
titudine principes, in monte speculatores, ad mensam di-
spensatores, nobis Christus constituit. Vestri itaq; mune-
ris erit efficere, ut uestra tū sapientia tū opera in mari Ga-
lyleo securi in multitudine non improbi, in monte tuti, in
mensa deniq; restituti, seruari possimus. Et ut cū sapiente il-
lo concludā, si delectamini sedibus & sceptris o reges popu-
li, (nā & uos reges esse non dubito) diligite sapientiā ut im-
perpetuū regnetis. Te autē B.P. Deus Opt. Max. copio-
sum diuinæ sapientiæ fontē in medio paradisi hoc est Ec-
clesiæ præstantiū uirtutū liliis rosissq; septum, irrigantē uni-
uersam faciem terræ nobis erexit. Neq; enim regnū est aut
natio aut prouincia ad quā inexhaustas sapientiæ tuæ ue-
nas, pro religione, pro Christiana Rep. & pace non exten-
deris, quibus regum animos penetrare, populorum mentes

conuertere, omniū deniq; corda cōsolari, semper studuisti.
 Alta sunt quæ meditaris, difficilia quæ aggredieris, ardua &
 heroica quæ tractas & perficis, ad firmandos Christiano-
 rum principum animos, reuocandos sectarum authores,
 profligandos deniq; Christiani nominis hostes. Itaq; sicut
 diuinæ tuæ dignitatis erga Remp. Christianam beneficia
 & præclara incomparabilis sapientiæ tuæ officia, lætis gra-
 tisq; animis excipimus, ita eadem te in multos fœlicesq;
 annos superstite, principe / uictore / diuino munere nobis
 affulgere assidue seduloq; precamur.

EIVSDEM DE INSCRUTABILIBVS

Vitis Dei oratio Coram ipso Paulo .III. Pont.

Max. & Reuerendissimorum Cardinalium confessu, Dominica

.4. Aduentus anni.

1539. habita.

QUod ex prolatis hodie Iohannis & Æsayæ oraculis parandas nostri seruatoris uias audiui-
mus. B. P. id nō leui animos, aut questione, aut admiratione, merito excitare uidetur. Paulus namq; eximium Christiani nominis organū, qui spiritū illoꝝ sensumq; tenebat, inscrutabiles minimeq; inuestigabiles esse uias domini, Romanorū auribus in-
clamat. Quis igitur obsecro parabit quæ nulla prorsus ratione scrutari aut inuestigare potest? Quis exigua humani ingenii ui, quæ diuina cœloq; eminentiora sunt, attingere ualeat? Cuius uix explicabilē rei modū soluere conabor, modo suas omnipotenti deo uias easq; incōprehensibiles esse per sua sero. Hoc autē una dūtaxat ratione absoluā. Nunquid quem ambulare fateri cogimur, uias ei negare poterimus? Ambulabo inquit inter uos & ero uobis Deus uosq; eritis mihi populus. Ambulat siquidē deus ipse immotus, & omnia mouens, immutabilis & cuncta innouans, in se omniū plenus & omnia sese implens, se cunctis infundens & uniuersa continens. Ambulat nimirū in consiliorū/studiorum/operūq; suorū uis, quas Iob ille unicū inter exteros religionis Christianæ lumen, mortaliū neminē scrutari posse affirmat. Id quod Esayas ipse sapiens & Ecclesiastes diuini numinis adflatu edocti pariter asseuerant, dū aliis immorta-

lis dei spiritū & mentē, alius consiliū & uoluntatē, alius di-
 uinorū operū omnē nos rationē latere prædicat. Si namq;
 homo reconditas hominis cogitationes inuestigare nequit
 qua demū ui archanas altissimasq; diuinę mentis uias pene-
 trare poterit. Solus enim diuini numinis spiritus, omnipo-
 tentis dei uerbo, quod expressam ipsius imaginē nostri di-
 xere, ceu uiuifica luce humanā diuinis in rebus mentē illu-
 strare ualet, Alioqui lux ipsa in rationis humanę tenebris
 lucet, & tenebrę eam nō cōprehendunt. Verū sicut anima
 sensitiua quā dicunt dūtaxat ui prædita, intellectiue uirtu-
 tis accessu ad rerū intelligibiliū cognitionē rapitur, ita ni-
 mirū humana mens, superiore per spiritū lumine illustrata
 ad immortalis dei diuinarūq; rerū intelligentiam eleuatur.
 Proinde Paulus ille gentiū Apostolus. Nobis inquit reuela-
 uit deus per spiritū suū. Neq; enim Moses ille deo familia-
 rissimus nisi in abdito rupis foramine, id est spiritu & cor-
 de Christi, qui uerbū & imago dei est, diuinę maiestatis spe-
 ciem intueri potuit. Quibus ex rebus omnē propositę quę-
 stionis difficultatē eneruatam sublatāq; esse arbitror, dum
 quod humanis uiribus negare cogimur, diuini id spiritus
 muneri & uirtuti acceptū referre discimus. Nā qui consiliū
 dei & uoluntatē nos latere asserit, idē quoq; spiritus ut salu-
 tarē perfectamq; eius erga nos uoluntatē probemus horta-
 tur. Qui inscrutabilem esse diuinorū operū rationem affir-
 mat, is improbos q; ea intelligere non studuerint, acriter in-
 crepat. Qui deniq; in summa inexplicabiles immortalis
 dei uias esse docet, is nobis eas non modo inuestigare uerū
 etiam parare præcipit. Parare inq; sed qua demum uirtutes
 Certę non humanarum uirium suffragio, sed diuini spiri-
 tus præsidio, At qua tandem ratione? profecto non præue-

niendo, sed subsequendo, non perficiendo sed obtemperando, non mouendo sed acquiescendo. Porro quas Dei Opt. Max. uias; quæ eius in nobis (siquidem omnia in omnibus operatur) consilia studia & opera statuimus; Æquissimi sanæ iudicii & locupletissimæ bonitatis, de quibus in Euangelio immensum mihi pælagus patere conspicio.

Non abs re Lucam diuini luminis splendore perfusum, dum inscrutabiles seruatoris nostri uias commemoraret. P. Amp. Romani illius Imperii quo nihil solunq̃ latius aut illustrius uidit, principumq; eius meminisse existimo. Quippe in quibus deum immortalē cuius immutabili consilio & nutu omnia fiunt, mirabiles decretorum uias constituisse, atq; immobili in eis potentia ambulasse cū ex sacristū ex prophanis annalibus colligere possumus. Quid enim obsecro illos absq; numine potētissimo, & diuino impetu adeo præclara & memoratu digna omni sæculo facinora peregissee, & cōspicuum spaciosumq; imperium, quod cætera orbis regna contriuissee legitur, sibi parasse asseruerit. Quæ omnia deum ipsum mirabiliter in eis gessisse credimus, ut superiorem regnis omnibus imperii sui & potentiæ magnitudinem, siue pro iudicii seueritate siue clementiæ lenitate, nationibus cunctis & seculis patefaceret. Et ut ad nostra proximius accedā. Nonne Deus Opt. Max. in ipsius Romani Imperii tetrarchis atq; præsidibus incōprehensibiles iudiciorum uias cōstituit dum eos in uitali nece Christi sui numinis organa esse uoluit; Sic namq; fortissimi illi inuictissimiq; ueritatis Euangelicæ præcones Apostoli, illos ad uersus dei filium, quæ inuincibili ipse manu consilioq; fieri decreuerat, perfecisse testantur. Sic diuinissimus ille Iob
mirabile

mirabile omnipotentis dei iudicium, & omnium in animis potentissimum numen exprimens. Qui tradit inquit consiliarios in stultum finem & iudices in stuporem, qui comutat cor principū terre & decipit eos ut frustra incedant per inuium. Verum longius ac statueram expaciatus, tandem operæ precium esse uideo, ut eandem quoq; sententiam in sacro Episcoporum ordine, cuius Euangelium meminit confirmare studeā. Quod ut faciam uos obsecro P. Amp. deum Optimū Maximū qui purissima lux & sanctissima ueritas est, ad explicandas iudiciorum suorū uias, spiritū mendaciū in ore omniū prophetarū dedisse, & uatem ab impio ad diuina oracula submissum, clara ueritatis luce destituisse animaduertite. Quem & Paulus ipse iis qui oblatam Christi munere ueritatem atq; salutem auersantur, per fallaces impiorum dogmatum authores, illusionis efficaciam plerūq; mittere testatur, ut pro ueritate errorē, pro charitate tirannidem, pro salute interitum, suo atq; illorum id exigēte merito recipiant. Vnde & filios illos Aaron qui alienum ignē altari imposuerant, diuinam presentiam testante uindicta consumptos extinctosq; legimus. Quorum infelice admodū exitu, exterreri exanimariq; merito deberent, si qui forsā san cecitate mentis, diuini in se iudicii seueritatē exprimentes, prophana pro sacris, pro fide perfidiam, pro religione impietatem, pro pietate sacrilegium, aut legibus statuere aut e cathedris producere nō uererentur. Impios nimirum sacrilegosq; Annam & Caypham referentes aut certe uincētes, quos deus omnipotens amentia & furore percussos, sic iræ suæ uasa esse uoluit, ut tamen pestilentem eorū perfidiam & sacrilegam impietatem, ad parandam suorū fidem atq; salutem conuerteret. Id quod ad inscrutabiles diuine

bonitatis uias, quas in proxima Euangelii parte elucēscere uideo, attinere facile animaduertimus.

CVM innumera sint quæ ad altissimas diuinæ benignitatis uias pertineant P. Amp. Lucas pauca quidē sed inestimabilia incōparabiliaq; cōmemorat. Inter quæ uiuū illud & incōprehensibile dei Opt. Max. uerbū, quod Iohannem cōterosq; uates transformasse perhibetur, omnium primum iure constituit. Quid enim aliud est (ut inexplicabiles eius alias tum partes tum uirtutes præteream) quod merentes animos exhilarare, deiectos erigere, languidos firmare, mortuos uitæ restituere possit? Neq; enim primus ille humani generis propagator, accepta damnationis mortisq; sententia nisi Euangelica plane conterendi serpentis pollicitatione roboratus, intolerabilem dei seuientis iram sustinere potuisset. Neq; Nohe ipsius seruati generis parens, nisi perpetui inuiolabilisq; fœderis uerbo stabilitus, in ipsius uindicantis dei cōspectu subsistere ualuisset. Quid referam de patre multarum gentium Abraham: qui nisi diuina benedictione in amplissimam æternæ mercedis spem erectus, neq; tot malorum generibus sese obicere, neq; difficillima quęq; aggredi tentasset. Quid de Dauide propheta regio: qui iuncto fornicationi homicidio, diuinę cōminationis terrore perculsus, nisi translati sceleris oraculo restitutus animum protinus abieciisset. Nos præterea grauissimæ desperationis inoli succumbere oporteret, nisi diffidentibus alioqui animis certam salutis expectatōē immobile dei uerbum ingeneraret. Quo in nobis ipse ambulans quid aliud quæso q̄ summam ineffabilemq; benignitatem, cum multiformi incōprehensibilium operum genere

nobis inspirat. Nam ut Euangelicæ lectionis ordinem prosequamur, ipse in nobis quos sacrosanctam sibi Ecclesiam delegit, dum integris ad eum animis assurgimus, obliqua dirigere, humilia subleuare, sublimia deprimere, praua componere, aspera polire, & omnia sursum deorsumq; uersare non desinit, donec suam in nos mentem spiritum & opera transfuderit, nostrasq; infelicissimas uias suis feliciter commutauerit. Has autem iucundissimas felicissimasq; Dei Opt. Max. uias ipsi nobisq; unius spiritus iure communes, uobis P. Amp. ducibus alacriter peragrarè debemus. Verum quod ab eis omnes in suas quemq; semitas, hoc est, impia pernitiosaq; studia declinauisse plerisq; uaticiniis prænunciatum legimus, id nostro potissimum tempore inq; nobis ipsis completum cernimus. Nam fides quæ aliquando lubrica dumtaxat nutauit, ociosa nunc mortuaq; apud nos iacet, Religio quæ imbecilla uacillauit, impietate obruta succubuit, Euangelicus uigor qui infirmus adhuc respirabat, extinctus cecidit, Christianæ deniq; uirtutis robur quod debilitatum languit, prostratum prorsus fractumq; euauit, Qua maxima in fidei morumq; ruina Christus a uobis quibus Ecclesiam cruore quæsitam credidit, eam doctrinæ uitæq; integritatem exigit, qua & imminentem primum eius sacrario cladem auertere, & errantem pereuntemq; gregem, cuius tum salutem tum sanguinem in manu habetis, in uias & pascua uitæ reducere studeatis. In te autem. B. P. ut Christianæ Reip. ruinas & naufragia e nostrarum impietatum abominationumq; tum meritis tum exemplis nata, pro tua diuina dignitate & sapientissimi animi felicitàte repares, spem omnē reposuimus. Te namq; Christus ipse pastorum suorum principem in Ecclesia sancta

constituit, ut cœlestis in te uia ueritas & uita quæ ipse est,
non tam regi q̃ pastoribus ipsis aliquando reluceat. Te
Deus Opt. Max. principium nobis uiarum suarum esse uo-
luit, ut quo diuiniore est principatus tuus, eo diuinius rerum
tuarum immo nostrarum successus, neq; a fortunæ ludib-
rio, neq; a communis naturæ uicibus pendentes in te ip-
se ambulans suo numine dirigat. Quo transformatus ut te
uerum optimumq; principem hoc est quendam orbi Chri-
stiano solem, quendam corpori Ecclesiastico animum præ-
stare, & Helyam ac Danielem non tam aduersus extero-
rum perfidiam q̃ domesticorum sacrilegam abhominatio-
nem pro Rep. legibus & aris referre non desinas, Deus ip-
se sanctissimis consiliorum factorumq; tuorum uiis assis-
dua cœlestis sapientiæ luce affulgeat.

35

EIVSDEM DE FÆCVNDA ECCLESIAE

Sterilitate oratio Coram ipso Paulo. III. Pont.

Max. & Reuerendissimorum Cardina-
lium confessu, Dominica 4.

Quadragesimæ anni.

1540. habita.

Iunq̃ ego in hoc cum celeberrimo Apostolici
ordinis confessu, tum sanctissimo tuæ maiesta-
tis cōspectu uerba facturus, imbecillitati meæ
aut lapsui ueniam precari debui. B. P. id certe
m̃hi hodie de fœcūda Ecclesiæ sterilitate Apo-
stolicis Euangelicisq; literis confirmata dicturo, merito fa-
ciendum iudicaui. Atq; Deum Opt. Max. multo arden-
tissimis uotis sollicitandum existimaui, ne quod uerbum
quod purissimis maximorū procerum auribus molestiam,
aut fidei pietatq; offensionem pariat, in linguam m̃etē
ue incidat. Qua etenim ratione sterilitas fœcunditasq; res
profecto sibi inuicem mirum in modum aduersæ, in uno
seruatoris nostri corpore Ecclesia, uno præterea Ecclesiæ
mēbro homine, una deniq; hominis parte animo, coeant,
ingenio complecti & oratione consequi difficillimum pu-
taui. Hac igitur de re admodum graui atq; copiosa nō om-
nia attingere, sed pro dicendorum summa, qui diuini mu-
neris beneficio in unam Christi Ecclesiam coaluere, omnes
ad generādā in se aliisue spiritaliū uirtutū propaginē na-
tura esse steriles, & aliena nēpe diuina opus habere fœcun-
ditate, Paucis demonstrare statui. Nam si eos dumtaxat esse
homines, ab omni diuina ui & uirtute uacuos, atq; ab in-
cunte ætate ad malum propensos animaduertimus, ac diui

nitatem quæ ueros Ecclesiæ filios decet, mente & cogitatione secludimus, nihil profecto in eis extra infœlicissimam sterilitatem comperimus. Si enim qui præter hominem nihil præstant, & corporis magis uiribus quàm animi industria & uirtute excellunt, eos ualentes homines uerissimi Romanæ linguæ principes dixere, nos in quibus natiuam solum naturæ dignitatem, eamque nullo alio diuinæ lucis radio perfusam consideramus, eos dumtaxat homines ad ingenerandum sibi aut aliis diuinum aliquod bonum imbecilles merito dixerimus. Nam nihil omnino rerum esse nouimus, quod ruptis naturæ suæ limitibus, ac mutata genuina procliuitate ceu extincto naturæ incendio, uires aut altius ferre aut longius extendere possit. Cuius rei clarior adhuc ratio ceu imago quædam atque stella in oculos mentis incurrit. Nunquid obsecro caro quam dicunt, eminentem spiritum, terræ cœlestem animum, uanitas solidissimam nempe ex deo genitam creaturam, ex se proferre potest? Hominem uero carnem, in qua immortalis dei spiritus non maneat, terram quæ cœlestem animum non pariat, uanitatem ex qua non nisi quod nihil sit, prodeat, in diuinis literis descriptum legimus. Quicquid igitur ex sola humanarum uirium fœcunditate nascitur, carnem non spiritum, terram non cœlum, uanitatem adeoque nihil esse fateamur oportet. Nam tametsi quosdam ad ciuiles humanasque uirtutes suo pte ingenio tum propensos tum exhortatores natura formauit, quæ tamen nos deo Opt. Max. cōmendent, & ad summam fœlicitatem capeffendam instituant, earum nulla mortalium animis semina infudit. Quis enim usque adeo a sensu menteque decesserit, ut deum ipsum non alia cœlestium & diuinarum quàm ciuiliū humanarumque rerum ordinem ratione & lege administret?

re asseueret? Id quod haud dubie faceret, si diuinas ad animorum, perinde atq; humanas ad rerum publicarum institutionem attinentes uirtutes, earumq; officia, sola naturæ ui parari posse concessisset. Neq; mihi quispiam primos parentes diuinæ participes imaginis & similitudinis, quæ ad perficiendum diuinum bonū suffecerat, ab immortalī deo conditos obiiciat. Quasi uero illa non usq; adeo oblitterata deletaq; sit, ut nisi spiritali regeneratione instauretur, posterī uix ulla eius lineamenta reliqua sentiant. Quippe qui lucem caligine, uirtutē imbecillitate, totius uerī boni amorem odio pernicioso infœliciter commutauerint. Quamobrem, si nos aliosue deorsum in humanarum rerum diffidentiam præcipitamus, si sursum in cœlestium rerum amorem rapimus, si a sinistris insurgentibus malorum procellis in fide seruamus, si a dextris ex animi sententia cunctis succedentibus ab insolentia illesos tuemur, id omne diuinī numinis fœcunditati acceptum referre debemus. Ex hac Ecclesiam cum ingenti liberorū propagine & quamcunq; in ea fidei religionis, aliorumq; diuinorum munerum & operum segetem prodiisse fatemur. Ipse enim deus, ipse deus Opt. Max. est, qui Ecclesiam ipsam suo adflatu fœcundat, & alioqui sterilem (ut regii psaltis uerba huc accommodem) matrem filiorum lētātem efficit. Quæ quo natura sterilior, eo spiritu fœcundior, quo indigentior, eo locupletior, quo imbecillior eo potentior esse dignoscitur. Nam humana sterilitate diuina fœcunditas, egestate satietas, imbecillitate potestas, clarior illustriorq; euadit. Itaq; huius diuinī muneris non humanarum uirium præsidio & fiduria gentium doctor erectus, se Corinthios Euangelio genuisse, alios donec Christus in eis formetur parturire, omnia deniq; ipsius

se Christi fortitudine roboratum posse affirmat. Qui alio
 qui nihil se esse confessus diuinæ uirtutis fœcunditati quæ
 sola rebus incrementum affert, omnem rerum gestarū glo-
 riam assignat. Si enim magnæ molis erat romanam & qui-
 dem breui tempore imperaturam ciuilibus legibus conde-
 re gentem, Christianam certe Remp. cuius æternum esset
 imperium, diuinis institutis in dies formare, seseq; aut alios
 in ea conscribere, multo maximum & heroicum opus, diui-
 naq; fœcunditatis partum iure dixerimus. Sexcenta sunt
 quæ si ocium supersit in hanc sententiam argumenta pro-
 feram, Sed angustia temporis exclusus, reliquum operæ pre-
 cium fore existimo si cœptum ea de re sermonem ad produ-
 cta hodie mysteria contulero.

Quo diuinę lucis fulgore duo illa clarissima Christianę
 Reip. lumina Iohannes & Paulus, fœcundam Eccle-
 siæ sterilitatem illustrent P. Amp. si eorum pondera uerbo-
 rum perpenderit, perspicuum satis fore arbitror. Quid
 namq; huius imprimis allegoria clarius aut insignius, qui
 rem omnem duarum matrum imagine nobis ceu sub ocu-
 los constituit. Ecclesia enim quam mulierem eamq; paren-
 tem nostri fecere, dum adhuc ab immortalis dei & omnium
 seruatoris fide ac religione aliena erraret, instar Agar quæ
 peregrina & aduena dicitur, perniciofa humanarū uirium
 fœcunditate, carnis non spiritus, legis non promissionis,
 seruitutis non adoptionis filios, eosq; a cœlesti hereditate
 extorres peperit. Cum uero ab inanibus naturæ præsidiiis,
 ad diuini muneris quo solo salutem adsequimur fiduciam
 translata est, exēplo Sarre quę princeps & domina nuncu-
 patur, sterilis atq; ideo suis diffusa uiribus mutata generandi
 ratione

ratione spiritus non carnis promissionis nō legis adoptio-
nis non seruitutis liberos immo principes & reges addere
coepit. Nam quamobrem non principes & reges merito
dixerim, quos deus Opt. Max. sua uirtute genitos, & in ius
dignitatemq; filiorum ascitos omni malorum pondere su-
periores effecit? Qui enim ipsi Sarrę promissa prole uer-
um ingressus infantem formauit ipse Ecclesiam & pluri-
mam in ea sobolem sui numinis & spiritus fecunditate ge-
nerauit. Quo circa Christus totius in Ecclesia fecundita-
tis origo, ut Iohannis Euangelium attingam, trans Galy-
leum mare secedens, ut cœlestis nobis aliusue partus diuini-
tus innascatur, contemnenda humanarum uirium suffra-
gia, & uirtutis diuinæ præsidis commutanda docuit. Sed
ad Paulum ipsum redeo cui perspicuam totius rei effigiem
depinxisse sat non fuit, nisi eam irrefragibili Esayæ uatici-
nio confirmatam faceret. *Letare inquit sterilis quæ nō pa-
ris, erumpe & clama quæ non parturis, quia multi filii de-
serte magis q̃ eius quę habet uirum.* O rem admirabilem
atq; omnium laude, præconio, literis, monumentisq; deco-
randam. Natura fecundam & ueteri quem dicunt homini
ceu marito iunctam legitimis filiis destitui, sterilem uero ui-
duamq; copiosa liberorum propagine, quæ uerum paren-
tem deum referat, locupletari. In cuius rei typum numero-
sam multitudinem cōtemptis suis omnibus soli salutis au-
thori adhesisse apud Iohannem hodie legimus. Proinde Ec-
clesia ipsa suę sterilitatis conscia, & occultam filiorum ori-
ginem admirata. Ego inquit, sterilis & non pariens, & quis
genuit mihi istos? Quemadmodum enim cœlum demissis
imbribus terram granumq; in ea reconditum, inebriat &
germinare facit, ita deus ipse æternum uiuumq; uerbū ceu
diuinum semen, in humana mente uelut, in fecunda hu-

mo, suo fecundatum adflatu, in nouam coelestemq; & diuina insignem imagine creaturam educit. Verum de maxima amplissimaq; matris dignitate quid referam? Quam Paulus ipse Hierusalem, eamq; supernam & liberam appellare non dubitauit. Quid de ea gloriosius dicere potuit? Ipsa namq; ueram pacem qua nihil iucundius, coelestium rerum amorem quo nihil diuinius, libertatem deniq; qua nihil fecilicis, immortalis dei beneficio acceptam suo filiis ministerio impartit. In cuius rei formam, seruatores quos sibi Ecclesiaeq; liberos generat, in montem securitatis, celsitudinis, & libertatis indicē, diuinitus traxisse, & coelestes deosq; iam factos, non tam corporum q̄ animorum cibo nimirum seipso, qui immortalis uitae panis est, Iohannes recessisse commemorat. Verum ne longius expacietur oratio, quae haecenus de fecunda Ecclesiae sterilitate in medium produxi, ad hoc caput referenda iudicaui. P. Amp. ut omnem ueri diuiniq; boni sterilitatem nobis, fecunditatem uero uni Deo Opt. Max. ascribendam arbitremur. Sed prohdolor extra hanc quam spiramus auram, & quas accipimus corporis animiq; dotes, in plerisq; nostrum uix uul lum diuini boni simulacrum conspicitur. Vix aliquid uerorum Ecclesiae praesidium praeter uestitum externosq; ritus Christianorum praeter lauacrum & inanem professionis titulum. Hominum deniq; praeter figuram & speciem cernitur. Huc accedit q̄ qui diuinas alias leges de rebus capitalibus non modo in oēs, sed maxime in animos incidendas praescriberemus, eas prodigiosis scelerum monstris funditus subuertimus. Nimirum dum sua fere quemq; ambitio libido cupiditasq; de sanitate & mente deturbat, & in ea calamitate constituit, ut uix ullam uerę germaneq; erga deum pietatis, & proximum charitatis, iusticiaeq; solidam expres-

samq; effigiem teneat. Hanc bonorum sterilitatem, malorumq; omnium sentinam, diuini iudicii & renunciaudę aliquando Apostolicę legationis metus emendandam suaderet. Sed præter hoc in omni semper Rep. prouisum meminisse debemus, ne sicut pulcherrimum fuit aliquam in ea dignitatis gloriam consequi, ita turpissimū sit eam per ignauiam aut improbos mores tueri & conseruare non posse. Quamobrem abs te. B. P. quem deus Opt. Max. post Christum nobis parentem esse uoluit, iure expetimus, ut presentem temporum & rerum calamitatem aliquando respicias, & sicut Christus ipse maximam ad se multitudinem uenire conspexit, ita nimirum tu eam a fide religione & sanctitate deficere animaduertas Christiana enim Respublica non tam urbium & regionum direptione per externos, q̃ morum corruptione per domesticos, in angustum contracta cernitur, dum eam nos qui populum & filios dei nos esse gloriamur, e uera & fecunda uitæ, quę Christus est excisi, & a patre degeneres facti, uita & moribus imminuimus. Quare ut eam summa Apostolicę administrationis auctoritate/ad fidei uitęq; integritatē reuocare, tum fecunditate propagare & augere non desinas, sedulo iungiterq; precamur. Ad quod diuinę dignitatis tuę munus, omnipotentis Dei & seruatoris gloria, ipsius Christianę Reip. incolumitas atq; salus, & immortale nominis tui monumentum merito te animauerint.

Laus Deo.

¶ Venetiis, in ædibus Francisci Bindonei,
 & Maphei Pasinei, mense Augusti,
 Anno a uirginis partu. 1540.